

門和
號 2351
卷 0-7

雲石遺稿卷之十三目錄



墓碣

同副承旨趙公

錫龍

墓碣銘

并序

高麗參知門下府事南公

乙珍

墓碣銘

并序

徵士雲溪黃公

信龜

墓碣銘

并序

贈教官敬齋李公

健

墓碣銘

并序

贈左承旨清溪安公

璘

墓碣銘

并序

贈左承旨李公

敏進

墓碣銘

并序

兵曹參議金公

圭夏

墓碣銘

并序

分教官金君

彥教

墓碣銘

并序

學生李君來淵墓碣銘 并序

墓表

先考吏曹判書 贈領議政孝文公府君墓表

伯氏領敦寧府事忠敬公府君墓表

從子吏曹判書秉龜墓表

贈吏曹判書北亭尹公志述墓表

左諭善信菴尹公得孚墓表

大司憲良靖黃公事孝墓表

贈左贊成武愍黃公進墓表

贈童蒙教官白公致旭墓表

處士 贈童蒙教官李公思永墓表

迂叟金君灑墓表

Blank space with vertical lines for writing.

雲石遺稿卷之十三

墓碣

同副承旨趙公

錫龍

墓碣銘

并序

我趙肇祖乎侍中諱孟佐麗開國貫豐壤後孫代言
諱炎暉有四子曰護軍諱思忠尙書諱思恭淮陽府
使諱慎知錦州事諱祗尙書公謀誅辛旽遇害而叔
季兩公皆變名以避之護軍公之子商議諱崇亦卜
地於尙州子孫因之寅永之系出淮陽公而處海州
者錦州公房也然其昭穆之可序惟護軍公淮陽公
兩派也粵我王考文翼公按嶺節尙爲管下宗誼由



是益睦及寅永猥躡前武宗人承洙以先碣屬曰吾先人甚習於文翼公敢藉此以圖不朽也寅永義不當辭謹按公諱錫龍字景雲自商議公七傳而有諱靖官奉常寺正 贈吏曹參判經學行誼爲士林尊慕稱黔礪先生又三傳而有諱大胤號立齋以至孝著寔公會祖也祖諱濯考諱麟經世襲詩禮隱德不仕妣延日鄭氏參奉葵陽女公以 景廟辛丑後六月六日生幼英悟記性絕人外翁每以千里駒稱焉英廟丙子擢明經第從弟承旨公亦同榜朝野爲之艷羨戊寅分隸槐院連丁內外艱未闋被翰選至辛

巳始赴召試不中 上曰召試之退期爲某也惜哉因特差假史將歸有挽之者曰盍少遲若 親政當獲六品階矣公不應丙戌補副正字轉正字著作丁亥由博士兼直太常俄陞典籍遷禮曹佐郎兼史館未幾出佐錦幕或薄之公曰孰非王事視厚薄爲去就耶辛卯除宗簿寺主簿遷兵曹佐郎陞正郎每陪衛戒禁禁中肅然無犯諱者 上累加褒賞錫馬錫弓者至於三壬辰除司諫院正言奏啓剴切駁正宰執 上嘉納因下備忘記曰近日臺風掃如新臺能得體也尋與諫長爭彈而罷卽日南還築小齋扁曰

晚樂怡然自放於林泉杞菊之間無復有當世念凡
十有四年以司憲府掌令召不赴 正廟庚戌 上
推恩于舊從臣年七十者普加通政特拜公承政院
同副承旨寔念其材地也粵三年八月十五日卒完
窆在邑之龍潭之坤原元配月城孫氏通德郎雲億
女育一女繼配南陽洪氏處士有圭女無育皆 贈
淑夫人誥皆葬于甲長山先局三配淑夫人娥林慎
氏處士思大女柔嘉無違後公一年而歿祔公墓育
三男三女長承洙次應洙出爲季氏後次興洙女金
洙鍊柳寔春權道相承洙男述立女金鎮龍南植正

李魯箕應洙無男取興洙長子述弘爲嗣女持平李
源祚李秀得柳圭文李瀉興洙男述弘出述一女鄭
光天柳聖文李存培金洙鍊男永之餘幼公嘗有位
乎言責矣未之或淹恬於名利乍進旋退固無以展
施所蘊而竊聽之鄉咸曰耆德人也其事親也家雖
貧滫瀡之供裕如也先公患廢視十餘年常左右承
奉勿之有拂戾焉及守兩制戚易備至而餐粥蔬果
一遵於禮推其餘以及乎宗族士友必務誠意相孚
而奉先之節尊賢之方尤致力焉其所措劃皆可以
經遠此公內行之純備也寅永雖未及覲德今見公

子若孫謹飭有法家風於是乎知公之能訓迪也銘

曰
憲憲黔翁吾宗之秀六世其顯學積行茂昌朝策名
抱珍將售爰陟臺省乃繩愆謬一揖而退用未及究
茅棟旣成君子何陋薄施于家出處殊邁晚擢惟允
王曰求舊匪靜不遠令德眉壽我作厥銘往省无疚

高麗參知門下府事南公 乙珍墓碣銘 并序

自古革世之際不事二姓者固多矣然亦爲人臣常
道耳至若國運未訖見幾而退家有佐命獨全其節
則非旁燭明而介石堅有不能辦焉此高麗靖憲大

夫參知門下府事南公諱乙珍所以倫盡義至卓立
百世之表者也公貫宜寧以新羅英毅公敏爲初祖
門下侍中鎮勇樞密副使君甫豐儲倉使益祗卽公
祖以上三世也考天老知靈光郡事娶中郎將咸陽
朴琮之女子長曰乙蕃官侍中次卽公也乙蕃之子
忠景公在剛武公間皆我朝開國元臣而公乃秉義
不屈故忠景之後孫秋江先生孝溫曰一門之內一
則採薇一則鷹揚者有以也公以忠惠王元年辛未
生于松京之佐卿洞早歲志學不與世俯仰恭愍王
十七年戊申始就聘登賢良科云按麗史是年四月

壬子王幸九齋賜李詹等七人及第時辛晫惡元老李齊賢讒諸王曰門座干謁儒者之害由是不用知貢舉特行親試公科疑卽其榜也公仕歷三司至辛禍十年甲子見主昏政亂斥家庄備酒饌與宗族故舊訣曰我不忍爲亡國大夫將退而耕於野明日棄官率妻子歸故沙川縣鳳凰山下始我 太祖與公有龍潛契及 御極訪於忠景公審公居命賈 御札召之公曰父子兄弟志各有不同汝 新王之勲也我則罔僕而已此心不可易矣忠景公泣告曰周靖殷亂十亂皆賢豈可曰非其義乎公反身而臥曰

夷齊何如居屢日更無所言忠景公不得已歸以實告大臣趙浚言南某以死誓宜遂其志 上歎曰此人忠節當表之環其地封沙川伯公痛哭曰我入山不深致此事遂被髮入紺嶽山石窟中日不覩天日之光足不踐窟外之地竟歿切三日白雲常繞之歛尸而出大風起吹窟中書蹟片片飛去後人名曰南仙窟其上一窟有石函安小石像刻被髮之形云此事雖不載國乘然曹南冥植任西河奎並有述焉崔簡易豈曰麗朝經學之士圃隱鄭公沙川南公冶隱吉公獨得其宗全節之人亦惟此三公最著洵信筆

也同時有前朝按廉使趙胤大臣浚弟改名曰狷其節同於公故 肅廟時鄉人士建祠於公所封沙川之界而並享之 正廟甲辰寵其額曰旌節公歿在我開國之翌年癸酉享年六十三譜言壽七十餘未詳其孰是而墓在沙川南臨澗里良坐之原配淳昌郡夫人林氏祔焉公有三子曰瑾珥珪俱著仕籍其後承之或顯或微不能殫記今樹碣以詔來後者重鉉允欽允懾允泰允一孝百皆居公墓下長房出也蓋公出處本末莫徵於邃遠而以其決去時考之林廉之獄不興威化之師不舉麗存亡尙未判矣公獨

灼知天命毅然自拔於危邦逮夫帶礪之盟並萃同室物色及於澤中環封比於介山十行天札待之以殊禮而公又矢死自靖終不失其所守豈所謂旁燭明而介石堅者非耶孟子曰伯夷辟紂居北海之濱子曰不降其志不辱其身伯夷叔齊與若公者亦可以上比無愧也銘曰

率彼紺嶽石窈而窟中有何人獨被其髮嗟廈將傾維未匪笏可質者蒼曰於此歿猶子應期興朝茂闕手擎丹綸溫辭以謁周亂殷頑兩不相越環封奚爵潛契能屈我志我守我探則巖靈颺震盪神雲蓬勃

琢以像之曷瞻髣髴祝以尸之曷慰幽鬱厥爲精光
上薄日月千載一片是南公碣

徵士雲溪黃公

信龜

墓碣銘

并序

古帶方之墟有以遺逸累徵而不起抱道邱園以考
其終者是惟雲溪黃公諱信龜字錫汝公貫長水新
羅尚主諱瓊其肇得姓也入我朝有領議政翼成公
諱喜以盛德偉度佐 世宗致治民到今稱之忠臣
贈左贊成諡武愍諱進殉于晉陽之役卽公會祖而
祖諱廷說官縣令考諱暉號塘村詞章名於世爲娼
嫉者所基官止正言妣南原楊氏生員時益女也公

胚胎前光生而粹美記性特絕於人甫成童已知有
古人爲己之學日誦四子濂閩諸書以求其所謂存
心踐形者嬰劇疾亦不懈曰夫病不治則死然君子
之所病抑有甚於死者余不以病爲病也手撫經傳
要語編爲一書名曰內省錄蓋以朝聞夕死自勵也
及丁兩艱廬墓盡禮其外除也慨然曰昔也屈首公
車爲親也親歿矣復有當世念哉自是隱居教授門
弟子請學者踵相接也賢士大夫高其風節莫不願
爲之交始拜 顯陵參奉乃 肅廟庚申更化之初
大臣以經行薦之也連除義禁府都事造紙署別提

並力辭不就或勸之仕公以詩謝曰若報黃河清已
了湖邊何守白鷗盟味其旨殆春秋義也與夫獨行
之人果於忘世者迥異焉嗚呼未可與俗人道也公
之卒在乙丑壽五十有三越明年葬于府西楓山先
塋之右艮原後享于高巖鄉祠元配青海李氏郡守
文柱女有三女適崔與三張浚尹行敏繼娶扶安金
氏學生之兼女無育以弟任龜之子戢爲嗣孫曾以
下若而人公秀眉朗目鬚髯蕭灑平居澹泊任真而
自事親奉先之節推以及於兄弟族黨朋友莫不各
盡其道使人人真有自然誠服者是豈本領講學之

無所底而襲取者哉所著庸學劄疑易說禮說等篇
皆可俟後而尋常詩文必傳諸道義亦見公所存也
始尤菴先生竄長髻廷議將以禮律告 廟湖南諸
儒欲辨之屬筆於公公草疏屢千餘言力陳先生道
德本末仍及黨人醜正之罪毅然有不怵禍福者公
雅不以時事留心然至義理當然處其嚴有如此尙
論者足以識公矣不佞嘗以公玄孫再洙言託名於
武愍之墓今公之五世適孫采又以公不朽來懇其
義有不可辭遂爲銘銘曰

黃河之水清兮吾將仕豈一日之可期惟百世之是

俟若斯人者不亦爲天下之士

贈教官敬齋李公健墓碣銘并序

嘗聞櫟泉宋文元公南遊方丈之山歷訪敬齋李公而歸曰吾見方丈又見李某某之高高於方丈一等每謂南州之請學者曰有李公在何爲遠從我也嗚呼櫟翁豈阿好人哉公諱健字士以上祖諱凌榦高麗門下侍中封寧川君子孫因貫焉高祖諱希良官僉樞丁卯虜亂以宣傳官上狀斥和曾祖諱興俊官宣傳見賊臣有柄國者棄職歸祖諱時焜考諱處武皆潛德不顯妣全州崔氏晚六堂諱養之後公以

肅廟戊戌生終于一甲之翌年葬于崔孺人墓下後遷府西靈溪負子之原配錦城鄭氏時元之女生二男二女男長心傳次學傳參奉女金萬舉具埏心傳四男陽白陽挺陽馥陽苾女盧光履學傳無男取心傳男陽挺爲后二女禹師舜進士權鍾達公少失學至十七始志于讀書先就大學以諺解爲師逐段力解積累而得之次及經傳濂閩諸書不由承受自造深奧蓋閉戶不出者十年聞陶菴李先生講道於北方遂徒步就之質其平素所得多默契者先生以樸實工夫詡之出所纂檢身錄贈之曰吾道之要盡在

是矣其見重師門如此後南塘韓公作先生詩跋也公作文辨之洞論心性大本而以師說明其理而已絕不爲門戶爭識者韙之公有至行其事親也婉愉洞屬溢於色辭先公性嚴峻而曰吾愧吾子不能自放者多崔孺人患風肢不任起居公常左右之凡所以承奉務適其心能使孺人自忘其有疾疾革裂指進之先公又患痢甚篤公嘗糞以驗其證逮荐遭兩艱其附身附棺者罄產以辦之極其禮毀不能立必以桐苴爲賴日省墓雖風雨不廢尤於奉先之節致力焉當祭必端肅於陳設處以待將事子弟僮僕莫

敢有惰容每於古人孝感處輒爲之泫然推以及於律身以莊御家以和訓後進不倦而平居恂恂無異乎常人及義理是非毅然有不可奪者門人學者相謂曰在先生側不忍去如慈父煦媮然亦自然敬畏不敢放肆公常言學不循本末則虛知不先切近則泛與其高談性命無與於身心曷若於人倫上用力畢竟自見得理氣實體或勸其著書則曰已經程朱辨釋當謹守成說耳家甚貧必嚴於辭受始僑佳山縣宰某慕公德曰不可使斯人餓吾土也捐廩取息以賙之公終不受及晚歲卜築於南原之龍湖知府

某謀所以構書齋者公引朱子拒趙帥朔亭事力辭之嘗歲大旱奴灌稻不及鄰人之田公呵之曰水公物不可專也亟決之母壅歸未至家而雨作人謂之處士雨公自少廢舉業專意爲己之工及充養旣久學醇而德邵四方之士過其廬必式卿大夫宦于南者多折節躬造焉鄉舉銓擬亦屢矣竟未拜官公議甚惜之雖然此不足爲公輕重也至 當宁庚辰以道儒言特 贈童蒙教官我季祖來湖公卽公同門也公之兩胤因其誼乞銘於我先人孝文公我先人蓋許之矣莫之副而終及寅永按茲道學傳甫歿心

傳甫今年爲八十又以我先人之莫之副者屬曰斯役也先公所許也子其卒成之余視蔭人也幸及此一縷使先君子盛德有所不朽雖死無所憾矣寅永旣感念舊事且悶其爲親之誠至篤老不衰也遂不敢辭爲之銘銘曰

好學近知力行近仁昔聞斯語今見其人滂彼洛建本諸曾閔賢師有訣一部檢身旣蘊文繡素履叶吉四方攸式處士之室厥德不僭以受 誥贈匪我諛墓櫟翁可證

贈左承旨清溪安公 璠墓碣銘 并序

呂參軍應鍾 天朝人從東援記錦山事曰父爲國死於忠子爲父死於孝士爲將死於義一戰而忠臣孝子烈士俱卽指義兵將高公敬命父子從事柳公彭老暨掌書記安公諱瑛也四公之節一也然安公布衣也未嘗食君之祿閉門讀書謹拙若處子又非有絕人之勇可摧鋒陷陣如當時紅衣石底諸將軍而臨患難奮袂而起視死如歸則豈不知力弱敵強也其意以爲不如是不足以鼓一世之義故也其爲天朝人所感慕不亦宜哉公家湖南之南原府母夫人觀于京將省之倭寇猝發 上西狩道梗公廢食

哭曰吾君蒙塵母存亡又不知吾當徇義旅赴國難因尋老母遂與柳公約梁公大樸會于潭陽推高公爲大將傳檄諸道整衆北上次恩津聞賊已踰錦山窺犯完山公曰賊若乘虛豕突兩湖危矣盍先救之高公從其計與防禦使郭爍合兵爲左右翼薄錦山之賊蹙之土城頗有斬獲會日暮公獨進焚廬舍放震天砲賊不敢動歸謂高公曰賊雖挫其勢猶盛宜休士觀變高公曰死職耳詰朝更進賊空壁出先犯官軍官軍不戰而潰義軍爲獨當計皆持滿而待忽有人急呼曰防禦走矣軍遂亂公慨然謂柳公曰吾

雲石遺稿 卷十三
一
輩不知大將所在何面目獨自偷生立天地間乎尋
高公扶上馬旋墜馬又逸公以其所乘授之步而翼
其後高公曰我大夫也敗當死公與我異可免也公
曰死當與公同之豈苟活乎同抱高公而死高公之
子學諭因厚亦從焉實萬曆壬辰七月十日而公年
二十八公伯父梅潭公諱昌國募義僧覓公屍獲之
始公篆刻姓字於劔鞘又以忠孝二字繡錦囊用是
爲證云事聞特 贈公掌樂院僉正是年十月葬于
府南楓樹巖午坐從先兆也粵四年乙未旌表其門
而光州錦山之人後皆以公配高公俎豆之家鄉亦

有祠額曰旌忠 肅廟癸酉加 贈承政院左承旨
公字元瑞安氏貫順興者自高麗上護軍諱子美再
傳而爲中贊文成公諱裕配文廟爲國中著姓曾祖
諱處順弘文博士當己卯士禍棄官歸號思齊堂祖
諱瑒號竹巖以文學行誼稱考諱善國司果妣延安
李氏父判書後白 宣廟名臣世稱青蓮先生者也
公四歲而孤事伯父如所生至誠奉母母病禱天嘗
糞如古人至行恒以失怙爲痛甫成童廬于墓終三
年青蓮公自公幼甚奇之期忠孝大節及委禽于梁
鼓巖子澂之門濡染訓誨專心於爲己之學撤舉業

自號清溪居士如文藝書翰之末亦早就鈔悟著名於士友間配濟州梁氏墓與公同原而稍下一男壽俊孫瑛瑛二子后益后岳后益二子琳瑋琳系子克昇今乞銘者六代孫璫也公之死二百年餘其可徵者獨趙山西安牛山數行文字之寂寥者已墓無刻贈無諡子姓微而不振君子於天道人事之際不能無疑焉爾銘曰

黃兔有源青蓮自出學篤行純早踐繩律方天步艱疇抗海氛釋經草檄死士如雲嗟錦之役咎由官軍獨力可支前茅已奔帥或喪馬舍我而徒雖則並命

取義各殊何所誌尸劒篆囊繡決以矢復其誓窮宙

贈左承旨李公

敏進

墓碣銘

并序

純宗三十年庚寅秋湖西儒金在澤等上言言連山贈判官李敏進丙子殉節事請加 贈之典下吏部部臣徐能輔題覆言係久遠無徵請令該道查之按臣朴齊聞採邑誌及家藏印蹟移于部越四年癸巳部臣徐俊輔據道查申奏遂加 贈承政院左承旨明年甲午道儒金相輔等又上言請旌閭下禮部部臣金蘭淳備陳前後事實請施之於是其 代孫將書其事于墓隧以光顯朝家所以寵褒者謁文

雲石遺稿 卷十三
於寅永余柱下也闡幽隱以補國史職也况此章章
著明者哉謹按李尚書翊會狀曰公加平人始祖諱
仁輔顯於麗本朝有諱亨孫策敵愾功臣封加平君
贈諡平胡公三傳而諱顥察訪 贈吏參生諱汝礪
判官生諱元軫啓功郎寔公以上三世而妣恭原尹
氏諱明遠女也公字子善號白峰以萬曆戊申生其
戰歿在崇禎丙子配令人順興安氏參奉悌吉女生
先公一年歿後公二年合葬于連山西天王山下卯
原無育以從子滢爲嗣云邑誌畧曰公世篤忠貞夙
著孝友當丙子虜亂以白衣倡義與本倅金弘翼募

鄉勇二千餘人勤王至廣州險川賊因大霧襲之公
與弘翼力戰殺數十人劔折矢盡並死之卽十二月
二十七日也公之奴永上貴上者尸而歸經屢日面
如生翌年 贈訓練院判官云其家乘畧曰兩奴之
求屍也以公襪與膝皆黑色志之也云嗚呼公之節
固卓矣乃其旌 贈之恩最後於同時立懂者誌與
乘又不過寂寥數行語耳尙能知公何如人也雖然
匹夫而勤王義也書生而從戎勇也異其服以死自
誓貞也白刃交下戰不旋踵烈也四者備矣亦足以
風厲百世何必多乎哉故其感於人也奴能竭其力

士能殫其誠部按諸臣皆交口而表揚之是可銘銘
曰
帶礪之裔金革之衛主危當斃虜強奚計猿號鶴唳
蚩霧方曠矢復以誓黑滕殊製華袞既逮月星晷晷
一節百世視此牲繫

兵曹參議金公墓碣銘 圭夏 并序

金公圭夏湖南之望也與我先大夫孝文公有雅分
寅永於弱冠時猶及見公公頽而髯其言訥如不出
口而其容儀謹厚有長者風心竊識之然實未知公
為何如人中歲相落落無所問聞及按湖南訪之公

沒且十年矣感念舊事每為之悵然後因公之孫漢
忠甫請以公樹墓之文成言又久今冒炎暑千里跋
涉寄京師客店中其懇益勤義不可孤也按公字乃
協後改汝初扶安人上祖坵以文章顯于高麗中葉
官平章事諡文貞我朝之著者郡守諱益福當壬辰
亂死王事 贈吏曹參判其下兩世並以遺逸舉齋
郎以倡義 贈亞憲為世名家曾祖諱敬基祖諱箴
考諱啓明皆不仕妣南陽洪氏學生濟民之女公生
於 英宗庚申 正宗己酉登式年第分隸槐院旋
以年滿陞六品除義盈庫主簿轉宗簿寺主簿 宗

廟署令司憲府監察辛亥出佐本道幕至戊午始除
司憲府掌令司諫院正言冬拜龍岡縣令始公職殿
中也繩糾以法不饒貴近及是 上召見曰汝之操
守文識已悉於監察時今欲試之治民異典也公感
激承命實心爲政尤以興學爲務邑人士多顯拔者
明年冬內遷歷持平掌令 純宗辛酉除掌樂院正
明年又還掌令時有醫女用禱祀事出入宮掖公捉
而刑之因上疏陳戒首以 君德爲勉次列六條急
務曰立志節哀勤學祛私振紀綱薄賦歛末言宮人
供佛之弊曰因果報應之說非 聖明所留意而彼

愚民易惑而難曉爭相效尤敗俗糜財非細事也
上嘉納乙丑冬復拜掌令疏斥臺官異論者兼論掖
隸有罪而未施法反覆爲言又賜切實體念之批俄
因微事罷尋蜀臺評公遂徒步還鄉扁其居曰歸齋
自是逍遙田野間者十五六年至庚辰以年八十陞
通政階明年辛巳行回厓禮鄉人士以爲榮旋以兵
曹參議召病未就其四月二十四日卒享年八十二
始窆于府北庚子移葬于長水縣西文秀洞艮坐之
原配淑夫人原州邊氏通德郎爾翰女柔和有婦道
生後公二年壽比公差一年墓與公同原異塋男得

雲石遺稿 卷十三
鑑女房濬觀趙秉禧側出男錫鑑得鑑男漢忠卽乞
銘者而三女高濟璜崔炳一鄭東麟漢忠男有相慶
相餘並幼公幼聰悟記性絕人雖以明經肄業不專
尙句讀必究其旨義沉思融解實下積工尤致力於
朱子書故雅不以學問自命而言行出處之際其異
於古讀書君子者幾希推之於喪祭之節盡其誠訓
子弟必以義方時與鄉中耆宿講劇道義至篤老不
倦而詩文之有陶寫著述者輒毀其藁蓋亦以韜晦
之也竊以是論公其所稟者厚故能有所受其所蘊
者深故能有所就有壽有德諸福備焉又可以名位

之不隆顯或少之哉銘曰

苑彼人文帶方之墟爰有三 贈衆芳攸廬公實趾
美克賁其閭真積有獲紫陽遺書遲暮釋褐冠豸符
魚殊知特眷匪藉吹噓何平何陂我自卷舒扁齋以
歸乃遂厥初壽秩登儀是用終譽我作銘詩古之人
歟

分教官金君

彥教

墓碣銘

并序

余年十五六時隨先大夫分司之任遊於崧崧故都
也其山川之氣湮鬱而不宣其在於人類多不能顯
達尙弓馬樂市井販賣其爲士而不屑此者幾希余

於士幸而得數人金君鍾五快談論善飲酒每酒酣
悲咤慷慨意不可一世奇傑人也韓君在洙在濂淹
雅通註疏學工古今體詩人比之五山車氏兄弟最
後與金君彥教敬五交敬五貌恭而性蘊藉素多病
閉戶不與事接以書自娛余由是尤喜之今居然爲
三十年餘之人者皆已化爲塵土而余髮種種矣嗚
呼寧不悲哉敬五之胤尚祺述舊誼乞銘於余余旣
感念往事遂不辭而敘之曰君貫海豐卽古貞州而
今爲舊豐德者也中世有諱大春居松京歌詠自放
至今以處士稱曾祖諱始光武科祖諱亨百生員考

諱載海早歿妣全義李氏春喬女無男君以生員公
長姪諱載泳子入繼本生妣蔚山朴氏澧女也君生
於 英宗甲午九月十九日累舉而不利晚登鄉薦
庚辰除分教官 當宁甲申四月二十四日歿享年
五十有一葬于舊豐德都羅山里申原配南陽洪氏
父羽龍舉四男二女男長卽尚祺次進士尚禎出爲
本生仲氏後次尚祐尚禧女馬潏林尚大孫男東賓
尚祺出餘幼君有至孝事母夫人甚謹夫人嚴或有
不怡色必婉辭解之悅而後已外氏貧無以祭別儲
錢供之養孀姊之無歸者極其誠旣歿割產以爲祭

田本生妣晚年有痼疾君晝宵侍側不敢以異宮暫
懈與伯仲篤友愛推以及於鄉黨親友樂易愷悌莫
不得其歡心而乃所好皆文雅士其志可知也生平
喜施予仗義恤窮未嘗爲責報計雖素昧緩急踵門
亦必極力副之雅尚樸素衣弊者改而已切不以新
製具一襲曰侈也吾所不能安也尤不喜聲色而獨
於蓄書有癖遇佳本輒厚售之故得書之富殆甲於
一鄉閒居緡閱以爲至樂教諸子有恒課每夕至小
齋講所讀書一過次論經史亶亶也嗚呼可謂躬行
而有志於學者矣余又聞此邦之俗日以渝比曩時

遠甚若斯人者可復見耶豈有之矣余未及知而然
耶銘曰

敦乎倫約乎身以厚施乎人何官之微而又嗇之壽
藏書滿家貽厥後四子讀之永保有

學生李君 來淵 墓碣銘 并序

寅永辱與李公字景進景養景國友諸公以其大人
府使公之命命寅永銘其季景敏之墓方余從諸公
於筆硯也景敏甫垂髫時從傍問字韶秀如玉於昆
季中若尤美然每小字呼之俄冠而娶而歿十年矣
悲哉景敏諱來淵前府使義悅之子祖諱明中監司

會祖諱顯應縣監 贈吏判高祖諱濡上相諡惠定
系出 世宗別子廣平大君諱璵而外祖判中樞南
陽洪貞簡公櫜也君以 正宗甲寅生歿于長公務
安任所得年才十八葬在坡州九龍洞之子坐原君
豐額而方頤沉深若老成人咸謂有監司公典型府
使公以其晚育鍾愛甚未或有驕傲之色父母諸兄
之側常藹如也性仁厚嫉惡人優而不迫雖鷄狗家
畜者不忍食凡外物一切無所娛經史之暇尤好觀
國朝事云君夙就可應舉矣君諸兄相繼取小大科
科必聯聯又在一月中華聞噪一世府使公深以盈

盛爲誠再經大比不許之赴君顧夷然無馳騫心惜
乎以君之器若識服習賢父兄之訓誨而天假之年
其所成就又可量哉配前承旨潘南朴齊一之女無
育取第三兄之第二子寅稷爲之嗣銘曰
旣畀以良姿胡不壽尙或紆悲有猶子爲后銘者誰
則其兄友

墓表

先考吏曹判書 贈領議政孝文公府君墓表
蓋先人讀易三十有餘年矣雖在阨窮之中隆顯之
後未嘗一日不用力於斯著有易問二編自爲之序

曰夫易莫尚於先天文王曷爲變後天哉天地之生久矣風氣所遭萬象隨之微後天吾知先天之用幾乎息矣號卦之數八其變七爲配爲流爲倒爲像爲互爲動爲環纔變乎先天卽後天也於流行也而文王取之以序序卦於互體也而孔子取之以序雜卦二者同出於後天而序不同者其取象擬數不同也是以作易之序序先之辭次之義次之吉凶最後焉然則姬孔之易豈出於二序之外哉竊謂先天之體從中而起後天爲用循環而復中起者以卦重卦成於六十有四循環者以爻演卦極於三百八十有四

知此則知流行之象矣卦有反對先天所倒倒者非他參伍以變知此則知方圖之變矣圖之旣變序雜生焉序卦者錯綜區分其方如劃井雜卦者中爻相聯其曲如中矩凡此皆取象之不同也天地之數不出乎著方圓之體各有其紀絡以扞揲之策則序卦當爻雜卦當期究其積周之實則序卦全八雜卦去四此則出於大衍者也懸兩曜而驗六卦之象重之爲直日之本祖八卦而別二天之數衍之爲推策之原此則出於曆數者也是以序卦之數十之當二篇之策雜卦之策十有二之當一元之率凡此皆擬數

雲石遺稿 卷十三
之不同也以是配氣而四時序以是體物而萬品遂以是究天人之奧探性命之微察古今之變蓋無往而不相準是則姬孔之旨又未始不同也其在乎人神而明之默而成之研於義窮於理至於命然後易不在書而在乎人又豈象數之所得囿哉嗚呼後之有學易者研究乎此序尚可曰先人志於易歟否歟小子寡學不足以讀先人之書况其德行事功言議文章之可徵於來世者能有所論述乎哉惟是系閥之事不敢不謹書之涕泣而表于墓曰先人諱鎮寬字裕叔姓趙氏貫豐壤上祖諱孟麗祖開國官侍中

本朝之顯者諱益貞官吏曹參判封漢平君諡恭肅公自恭肅公簪組相聯七傳而有諱道輔敦寧府都正 贈左贊成是先人曾祖也祖諱尙綱吏曹判書贈領議政諡景獻考諱暉吏曹判書 贈左贊成諡文翼妣貞敬夫人豐山洪氏禮曹判書 贈領議政諡貞獻諱鉉輔女先人以 英宗十五年己未生壬午生進兩試辛卯筮仕不就乙未由侍直擢求賢科壯元時 上夢傳巖事親發策得先人對大悅未唱第授承政院同副承旨議以不次位之已而爲明年丙申 正宗嗣服賊臣國榮新用事素怨文翼公搆

誣案將禍之先人擊鼓乞覈例就囚聞譌言文翼公有後命自刎于獄絕而蘇嗚呼寧忍言哉 上閱其孝亟出之免文翼公死自是上言者三上疏者一藉藁而胥命者又久之凡十有九年事始白 上畢燭之追獎文翼公甚摯復進用先人特旨差備邊司提調曰先卿未卒之志可効矣先人謂父冤伸子當自靖屢告退不許逮 純宗丁卯太夫人年九十一乞終養歸階輔國崇祿大夫官九卿兩館止判敦寧府事入耆社其於外也始尹廣州 英廟試治民也分司開城水原兩都爲養親也慶尙全羅等道觀察使

與吏曹判書皆力辭免以先誣在藩與銓也戊辰閏五月十五日考終于東湖舊廬壽七十太常議諡曰孝文 當宁初用男萬永國舅恩 贈議政府領議政先人嘗自號曰柯汀有遺集幾卷配貞夫人 贈貞敬夫人南陽洪氏府使 贈吏曹參判諱益彬女領議政忠簡公諱致中曾孫生與先人同年其周甲之正月四日卒先人方判戶部 正廟聞之語筵臣曰予聞戶判夫人德儀克備戶判之悼之也固宜嗚呼婦人而獲此亦罕矣始窆原州先局及先人之葬卜于永平廣石里負巽之原遷而合之舉三男四女

男萬永今領敦寧府事豐恩府院君原永牧使出爲
季父諱鎮宜后寅永今右議政都正李復淵庶尹金
炳文郡守尹慶烈士人李在文婿也萬永二男四女
男長秉龜參判次秉夔教官女長卽我 孝裕大妃
寔誕我 主上殿下其次適進士李寅禹縣令俞致
善金奭鉉原永一男秉駿文科三女適李坡進士元
世貞洪祐昌寅永無男取秉夔爲嗣三女適承旨金
學性進士李寅禹徐翼輔而經歷李寅達縣令金大
均弘均進士世均判官尹致容承旨致定李稷鉉皆
外出稷鉉系也

伯氏領敦寧府事忠敬公府君墓表

惟 上十有二年丙午冬十月之小望丙寅領敦寧
府事豐恩府院君趙公萬永卒蓋府君寢疾周歲而
哭長子又周歲而竟易篋焉慟哉府君卽我 孝裕
王大妃之父我 主上殿下外祖也自始病醫藥勞
問交於道訃聞 上震悼旣舉哀于闕庭因命成服
日臨吊于家於是弟領中樞府事寅永上劄諫勉寢
之 下教畧曰嗚呼小子遭家不造先庚後甲險釁
閱歷賴至誠保護式至有今日者繫誰賜也以祖孫
兼導迪輔予以養德翼予以篤敬內而忠勤勲勞外

而寅協匡濟垂二十年如一日其衛國忘私之純心
偉功求之古昔孰有倫比昨冬元舅逾理之喪已家
國不幸而未及一朞又聞此報慟矣慟矣予將疇依
凡庀喪之具皆出度支卽日 贈議政府領議政賜
諡忠敬公 親綴文遣閣臣侑之畧曰嗚呼小子以
慈殿之心爲心以 慈殿之事爲事天理之正也人
情之常也况小子於公情理之別匪尋常祖孫比哉
自予誕彌之初其苦心至枕靡不用極寒燠保蓄飲
啖節宣公之所以戒小子也終始典學危微精一公
之所以勉小子也無教逸欲則公乃披心善政養民

則公乃進言志願予小子期望予小子非先王之憲
章不陳之非前聖之謨訓不稽之忠欵焉誠實焉夙
夜不懈罔或少忽嗚呼小子孤露未堪家多難公感
知遇於 兩朝受倚毗於 太母以肺腑之親託心
膺之重鞠躬盡瘁出入贊襄非我公何由以得有民
國之維持耶惟勤與勞終不可諉也及葬又 親綴
文賜侑命中貴人護之古所謂生也榮死也哀者非
府君之謂耶府君字胤卿自號石厓豐壤人上祖諱
孟高麗開國勳位侍中曾王考景獻公諱尙綱 贈
上相王考文翼公諱曦 贈貳相皇考孝文公諱鎮

寬 贈上相三世官皆冢宰也妣 贈貞敬夫人南陽洪氏府使 贈吏曹參判諱益彬之女領議政忠簡公諱致中曾孫也我家自祖先以來累善而積慶至我曾王考益大以昌繼之以王考皇考讜議茂績著在王室及府君趾光繩美誕我 聖母用鞏我宗祊無疆之基天之生府君豈偶然也府君以 正宗嗣位之年丙申端陽日生 純宗辛酉小成癸酉以 顯隆園郎登增廣文科歷三司春坊間嘗按廉於湖南湖南人服其威行臺於瀋陽瀋陽人稱其儀暨我 慈聖膺 世子嬪選府君怵然如不自容曰

我世胄也徐步平進庶或寡過今奚爲有此也自是凡朝廷間進退可否之際未或一涉其議惟以保聖躬一事爲終身秉持其遭際於 君上有以夫府君官簿繁不能悉書而正卿則判吏戶禮刑四曹與京尹也戎垣則禁御訓三營也又暨我 慈聖進崇號府君亦有封爵至于躋耆社賜几杖近古未嘗有也今寅永病且死迨其未死也意欲爲數行文樹諸阡然府君言行德業之塗耳目者不敢作贊美辭以非府君意也亦非我事死如事生也是以謹就我聖上隱盡之教撮其要冠之篇首用昭揭恩言嗚呼

雲石遺稿 卷十三
尚可以詔後人也耶配 贈德安府夫人恩津宋氏
牧使 贈貳相時淵女文元公櫟泉先生明欽孫文
正公同春先生浚吉後孫淑範儀度稱儒家風生與
府君同年先十三年甲午七月十四日卒始葬坡州
基谷丙午八月移窆于春川開陽洞艮坐原至十二
月庚申以府君合祔焉男長秉龜吏曹判書諡文肅
次秉夔前承旨出爲弟寅永嗣女長 孝裕王大妃
翼宗后也次三女適進士李寅禹校理俞致善進士
金奭鉉

從子吏曹判書秉龜墓表

嗚呼此我從子秉龜字景寶墓也其幼也豐穎而方
頤瞻視有光類不似衰世人其長也蘊若沉厚而見
解則精敏著若嚴毅而施措則通鍊加以飭躬之謹
不忝庭訓至言議事爲之合當然處確有不可奪者
吾常謂稟質旣若此壽可延福可享迺不及中身又
無男女所育痛矣哉我趙著姓自高麗開國功臣侍
中公諱孟籍豐壤至我曾王考 贈領議政景獻公
諱尙綱寔大而昌王考 贈左贊成文翼公諱曦皇
考 贈領議政孝文公諱鎮寬我伯氏今領敦寧府
事豐恩府院君萬永暨我從子皆官吏曹判書五世

冢宰古未嘗有也其於戚聯也爲今 孝裕王大妃胞兄而今 主上殿下元舅也其於恩澤也疾方革御醫費藥診視訃聞震悼特 下教曰此重臣乃心王室勤蓋著績予所倚毗今焉已矣仍賜葬需及東園副器成服日遣承旨致脩亟命議諡諡文肅公其於踐履也壬午司馬丁亥由翊衛司副率擢文科歷三司春坊泮長瀛長 奎章閣直提學弘藝兩館提學摠戎使禁衛大將訓練大將京兆尹吏禮刑工判書階止資憲而 純宗元年辛酉孟秋二日其生朝也 當寧十一年乙巳十一月十一日其歿日也年

甫四十有五其翌年丙午月正十有二日合祔于元配墓右卽原州爵臺洞先局也妣曰 贈德安府夫人恩津宋氏牧使 贈貳相時淵女贊善文元公櫟泉先生明欽孫文正公同春先生浚吉後孫元配曰贈貞夫人延安李氏監司在秀女祖吏判翼憲公文源曾祖元輔文簡公天輔外祖禮判定獻公海州吳載紹生同年先二十年丙戌十月小晦歿繼配曰貞夫人安東金氏牧使喬根女右議政文忠公尙容後孫也嗚呼其勞勩在王家績庸在官守評品在士友我何言哉只記生卒系閱表其葬以禁樵牧而已丁

未八月晦日移窆于春川北內面銅峴亥坐之原以舊兆不利而又與豐恩公新墓隔岡也

贈吏曹判書北亭尹公志述墓表

嗚呼哀哉世衰道微風節不作禍福之說勝而首陽拙中庸之義晦而伯始賢若太學生尹公諱志述抗正議死士至今悲之然世之熟揣摩工利害者或咎其太激嗚呼天下有真是非否乎昔者 仁顯后之喪詛由禧嬪嬪實誕 景廟而 肅廟斷之以義是為辛巳處分尹拯師事尤菴宋先生覘禍機背之肅廟明辨而嚴斥焉是為丙申處分及李忠文公頤

命撰 肅廟幽誌或沒而不書或微其事而漫之又肅廟命祀何蕃諸賢於泮未克就誌以已施言公適主太學議曰所關重者有朝廷在當先從泮事辨疏論其錯請建祠得許然而兩處分事竟莫敢先發公奮然復倡疏論諸生惶恟舉走匿只與同志者捲堂痛陳 先王處變衛道之實仍言相臣白首顧瞻忘厚恩藉讒口而傳會諱親之說以誣一世又言 先王 先后傳序於 殿下則 殿下不敢有私親也請改撰邸報出人皆戰慄始例批臺臣金棹繼之又報可已而忽命遠配伸救者多至泮儒空館乃寢於

是公名振朝野而視公爲奇貨者迭投匭請斬槩不報翌年凶徒結奧援盡黜舊臣越數日下備忘論以誣辱私親命正刑黨人韓配夏等作禁堂逼之欵將勒誅之公曰君命也當死然何罪也禁堂曰誣耳對曰誣構虛也明先王志事者豈構虛耶又曰不招而殺法乎如之何開此路也三訊不服取中旨殺之實辛丑十二月十七日也時景廟有疾一邊人謀翻朝局以搖國本故先致公極律示出上意此諸賊諱疾之原而滔天之禍自此兆焉其後李忠文受後命遺戒言尹某義正我子孫不可以駁我故嫌也

始公就拿也從容辭父母曰死非懼惟兩親老耳其姊囑廣引以覲生公正色曰雖死不可苟也禁堂喝府隸施毒杖隸竊罵曰賢人也忍酷下哉臨載一老奴與從姪名敬哲者泣而隨公曰歸報我兩尊人勿以不肖念傷地下心又曰姊毋違父母側又曰婦有娠幸勿死又曰乙復託士元教乞士衛女妻之乙復公子甫七歲士元公姊夫閔文元公遇洙而士衛文元兄文忠公翼洙也敬哲曰叔安保士衛也公曰斯人非負我者將刑猶斂髮夷然無怵禍色見者烈之獄方急有趙泰萬者賊臣泰億兄而日號泣于街路

李公志遠以賊臣真儒鳳輝爲甥爲友婿而舍職次
操文哭刑所曰求仁得仁又何怨坐是竄忠義之感
人心有如此公恭原人上祖始榮高麗左太判事我
朝直提學碩輔以清白顯曾祖諱有吉郡守祖諱遇
丁掌令考諱景績判官文行著士友間妣綾城具氏
參奉守禎女配 贈貞夫人首陽崔氏都正星瑞女
禍作日引決救之得全乙復長以一復行遵遺託娶
閔氏女文科官正言長女適士人李東亨次遺腹女
適判官金憲行公葬廣州芳谷夫人祔焉公以 肅
廟丙子生貌秀而志潔有至孝長尙氣節好信義弱

冠成進士死時年纔二十六矣越五載 英廟乙巳
因儒疏 贈持憲賜侑配于嘗所請建之崇節祠丁
未復黜久之還其贈 純廟初又復其享今 上
七年右議政臣趙寅永以是歲爲公受禍之年請追
獎錄後超 贈吏曹判書賜諡正愍諡法以正服人
曰正使民悲傷曰愍致政尙書金公履陽泫然謂寅
永曰履陽先太夫人卽公遺腹女也不肖耄矣幸至
今存天意或使之躬覩盛典庶有歸告語歟將及此
樹石于公之墓以答 聖恩而光泉塗是舉也子旣
尸之盍爲文以徼惠于終始也寅永作而曰寅永陋

惡能闡幽潛也遂菴權文純公語公事曰先觀其義
理如何閔文元撰公狀曰此事極精微非俗見所臆
斷斯言可百世也公號晦隱一號北亭而世每以老
彭稱老彭字也春秋之例稱其字貴之也嗚呼嫩矣

左諭善信菴尹公

得孚

墓表

自古聖哲之君雖睿智天縱亦必有資於始學如殷
甘盤然後克底于成今以我朝近事言之有若 肅
廟之於趙公復陽 正考之於南公有容朴公聖源
尤章章著明者也肆惟我 主上殿下道洽政治成
已而成物其本實出於諭教之早其人卽故諭善尹

公諱得孚是已夫以 先王之明聖爲元良輔導旣
徵山野宿德之士選於朝復得公焉非公之賢曷能
致此雖然世皆知公禁中勸講之勞而至於公秉直
不回者莫之詳也始公救臺臣朴在源疏到院未及
徹而罷又討賊臣國榮因陳後車之戒爲當軸者所
怒遂有銓部枳望又駁玉堂李宗燮重臣李命植及
尹拯復官事大被詆訶幾陷于不測又盛論判府事
徐命善配金甲島暨宥還朝議猶斤斤請鞫之其詳
在國乘而公之謇諤自任可推也惟 先王獨察公
孤立無援故每除拜特旨爲多丁巳今 上在元子

宮開講筵因大臣尹公著東建白置賓僚師傅宋公
煥箕陪禮而歸右諭善李公直輔辭不就公以左諭
善專任其事竭誠殫精而公已老越三年己未月正
三日卒于位享年七十七自始病勞問甚渥及喪命
講院吏庀之今 上初元又特命內閣撰文侑之仍
錄其孤嗚呼稽古之榮亦至矣公字士休號信菴系
海平遠自麗朝赫烏而我 宣祖名臣海原府院君
諱斗壽海平府院君諱根壽兄弟以勲德文章光贊
中興公卽海平六代孫也曾祖諱瑞別檢祖諱聖冕
考諱源以公貴並有 贈秩妣延日鄭氏縣監津之

女松江相公後也公以 景宗癸卯生 英宗甲午
以明經桂晝登第例付六品內則典籍兵禮吏郎三
司 實錄郎外則掌試于湖西嶺南宰殿山寧海兩
邑逮甲寅邦慶推恩以年七十陞緋歷工刑兵三曹
參議承旨諫長泮長丁巳進秩嘉善拜禮參兼同春
秋戊午移工參此公世閥官簿之大畧也配龍仁李
氏正郎普萬之女懿範甚備先公三年卒葬與公墓
合祔于瑞山蓮峰下卯坐之原舉三男一女男長毅
東蔭庶尹次久東文輔德次趾東女適具圭慎孫曾
以下多不盡記而今之請文者長孫經烈也公有孝

友至行事親極其婉愉處同氣以和接人應物無拂
逆之言自以氣質所受或偏於柔每誦邵子剛柔說
自警焉及立朝乃以過剛見稱而講席誘掖之際辭
氣溫厚藹然有感發處 先王教曰意某甚峭直今
見之仁善人也蓋公矯揉之久自然中矩內剛而外
柔故也公少學於黎湖朴文敬弼周之門恒以講論
從事充養有素雖嶺海顛沛終不以得喪累其心恬
如平昔所以有晚年受知也顧寅永晚進不獲奉履
綦之末則今於公不朽者何能有發揮增重而記昔
先大夫孝文公嘗與公作僚於秋部亟稱公守法不

撓尹相國出海原房於公甚近而內推轂公任講職
如彼雖謂之內舉不失可矣以此論公庶不爲無所
據也耶

大司憲良靖黃公

事孝墓表

公諱事孝字百源長水黃氏自新羅侍中瓊至翼成
公諱喜爲本朝輔臣之冠生諱致身官判樞諡胡安
寔公考若祖胡安兩娶有九男五女公居第六繼配
黃夫人出其父平海左贊成象也公當盛世位正卿
言行事功必多矣惟 成宗丁酉式文科見榜目議
政府舍人見金佑畢宗直所著胡安碑承旨陞嘉善

雲石遺稿 卷十三
出按海西見洪虛白貴達所著詩若教書資憲行大
司憲兼 世子右副賓客見於譜而 英宗戊寅公
與公之子長山君坦同日議諡諡公良靖俱爲信錄
狀所載多舛可傳疑也然公翼成之孫胡安之子服
習家庭斷然是賢大夫奚以他求哉公葬交河金蠅
里成原配慶州金氏祔焉郡事日知女男長卽坦策
靖國功追封公長原君次塏堞並司直女宋胤班康
好仁鄭舟臣公之後甚蕃而微獨武愍公進以忠節
著今乞文者其裔再洙也

贈左贊成武愍黃公 進墓表

嗚呼此故殉節臣黃公諱進葬也葬二百有餘年七
代孫再洙始以谿谷張文忠公之銘樹顯刻今又屬
余題墓嗚呼公義勇貫日月名聲垂百代雖婦人孺
子咸能誦之况浦渚趙文孝公撰行狀尤齋宋文正
公撰諡狀清陰金文正公撰祠碑西河李文簡公撰
壇碑白沙李文忠公撰日記牛山安文康公撰敘事
克謹克嚴磊落相望有一於此足爲不朽尙敢以末
學自僭哉盖聞晉陽之役清正以三十萬衆乘忿而
來勢甚張當是時天兵及我諸帥環晉而營者累數
十莫不震懾左次以避其鋒獨倡義使金公千鎰慨

然爲死守計先入城公將以湖西之師會之郭忘憂再祐挽曰晉非公界也公曰已與倡義言可食諸圍拒凡九日日七八合合必摧却者公之力爲多忽飛丸中左額而歿乃癸巳六月二十有八日又一日而陷全城殲焉論者謂公不死晉可保信哉然賊之精銳亦挫盡不能復進一步湖南之完寔賴公云余嘗過晉登蠡石之樓誦崔節度慶會詩感公事尤深遂爲之說曰公字明甫長水人有諱喜爲 英陵賢輔五傳而公以嘉靖庚戌生登武科辛卯辟信使幕入倭買寶劍歸曰倭已啓心矣明年果入寇公以同福

縣監破賊于全州之安德院又大破之于梨峙倭所稱朝鮮三大戰之一而公由此顯又以湖西節度躡賊至尙州連破之此其大畧也若公材力性行系闕官簿俱詳顯刻而家鄉有祠 孝廟寵其額曰旌忠逮 顯廟諡武愍逮 正廟命不祧皆所未及載者配晉州蘇氏公 贈贊成從封貞敬夫人及卒合祔于楓山辛原墓與祠皆在南原後之著者在男曰判官廷稷以丙子舉義 贈兵曹參判在孫曰曄官正言在曾孫曰信龜舉遺逸官別提俱祠之鄉近世遂不振無有登仕籍者矣昔安文康抵李延平書極言

雲石遺稿 卷十三
公家之不錄以爲中夜起坐撫膺長歎嗚呼使安公在者當如何哉

贈童蒙教官白公 致旭墓表

有一小善患人之不知人恥之不求知於人人知之莫或辭其名人知之亦不自居難也小善之不自居謂之難况至行乎湖南有白孝子鄉大夫任承宣長源崔持憲達翰諸人將舉之孝子艱然曰事親職耳可沽譽哉且我實不能焉用薦君子謂孝子於是乎能孝矣孝子幼有至性侍食於親匙多寡必默數或饋之魚肉輒未敢先嘗及長躬樵漁以養不以服勤

之事勤諸人嘗乞米鄰縣聞父病薄暮將發鄰縣人固挽之孝子曰孰有聞親之病而晷刻留者所過有巨嶺兩虎當途孝子道其急且祈之虎帖然若聽命隨而後先通夜行百四十里比到家鷄始鳴時年十八矣父歿哀殊絕稍甦泣曰老母在我死誰養者乃歔粥終三年廬于墓喪母亦如之方母病也隆冬思鼈羹偶剖冰獲一鼈明日尋故處又獲之病得少間焉噫虎惡獸也鼈微物也誠之所格各効其異非至孝而能之乎雖然孝子之心猶不敢自以爲孝不如是不足爲孝之至也既歿南人士狀其孝始有教官

雲石遺稿 卷十三
之 贈孝子諱致旭隋城人七世祖光弘官湖堂號
岐峰考瑞彰妣朴氏竹川君光前之後孝子以 英
宗辛未生始居長興老而遷于光陽己巳五月終葬
縣之玉谷之西原配李氏祔焉二男魯鎮河鎮女吳
章煥

處士 贈童蒙教官李公 思永 墓表

古帶方之墟有好義士曰黃再洙與余熟嘗携一佳
少年至曰此李生翼龍者吾鄉之孝子靜齋處士曾
孫也欲乞文以表其阡幸勿辭余雅信黃君故雖諾
之亦未之踐去年余判禮部李生又踵門曰吾曾祖

褒孝之狀下部議久矣今非足下職歟吾非足下之
望而誰望也余固景慕處士且感李生之誠然部有
事不暇及余旋遞未幾聞李生死愕曰吾負李生矣
偶與今宗伯鄭公元容語及之鄭公爲之盡然遂題
覆請施 贈處士童蒙教官余因撰次其事曰處士
諱思永字公孝系璿派 成宗別子安陽君諱恂九
世孫高祖諱斗煥刑曹正郎曾祖諱挺奎祖諱元夏
考諱聖濟皆不仕妣昌原丁氏名儒橫後也處士以
英宗戊申生 正宗癸丑十月七日歿葬府北登石
山子原凡三娶安東權氏星州李氏洪州李氏並

雲石遺稿 卷十三
贈令人男述祚述興中配出述元述權三配出而祀
孫纘默卽翼龍父也餘不盡記處士幼有至性甫八
歲父以微事責伏庭下不敢退俄視之雪已沒肩有
大雷雨雖夜必入抱母恐母驚也稍長慨然有師友
志北學於都下忽歎曰爲人子千里遠遊何以慰吾
親歸不復出自失怙夜輒拜斗祝母壽蓋三十年如
一日而滫瀡之供極其誠扶將之方極其勤與二弟
終日侍婉愉如也母喜曰子能孝一之爲難夫我幸
有三孝子夫光州牧某之母母之姊也邀母夫人厚
供之及歸曰官厨豐終不如吾兒之養之宜也如父

病而割股母病而裂指疎節也旣者喪母廬于墓疏
食亦如禮旣闋制語必泫然泣血人謂之難推之於
奉先以敬接人以和訓子姪以莊一鄉式之古有純
孝人者殆近之矣處士爲學專主四書手抄心經近
思錄命曰經思合抄又取家禮喪禮二書訂訛補漏
俾後學有考而晚年課程在於易云余旣述此文無
所歸之然余識處士之曾孫由黃君今傳之黃君斯
或不悖於吾夫子哭賜氏之義歟嗚呼重可悲也

迂叟金君 漢墓表

持憲金君漢益湖南之選也嘗謂余曰於此有人焉

其事親也孝其與人也誠隱居而求道不以科宦進取爲心以沒其世者何如抑可爲善歟余應之曰奚其善其惟君子人乎曰吾宗有號迂叟者五歲而孤哭踊如成人奉母婉愉有深愛母食而後食母衣而後衣藥必手煮服必躬澣自少不習功令而爲母命再冠鄉解母亡不更赴及年與德益進鄉人士每欲撫其實登道剡必力挽之曰窮居自修士之常也人不知何傷其篤行有如此者始讀小學曰爲學之道舍此不可他求稍長泛濫百家而以洛閩爲歸所著如卦變跋自警銘諸篇亦可見造詣也故遠近受業

者日踵於門每月朔輒講家禮擊蒙要訣以勉之倡鄉飲酒禮以興學者蔚然爲後進師表其好學有如此者然而生不沾一命死又無立言之達者闡發幽光惜哉其孫燾將以樹阡之述謁諸子子勿辭已而燾以申斯文禹模狀乞余文甚勤申君雅士固可徵而其狀與金君言同余由是諾之而亦未之敢踐者忽忽六七年所今燾之子澤壽又以乃翁之書繭足而來其義無以終孤遂檢舊篋而纂次之曰叟諱澗字而靜扶安之金以高麗平章事諡文貞諱坵爲肇祖因世居焉入我朝簪組相承而曾祖諱時佐祖諱

日煥考諱敬魯皆不仕妣豐山洪氏諱大敘之女叟以英廟丙寅生歿于純廟己巳葬本縣鶴峙坐壬之原凡三娶羅州林建夏女全州崔梯女義城金維彥女男相誠相文相業女盧光升妻林出也男相奎崔出也男相德女鄭滋妻金出也相誠出為伯氏進士塗後四男燾燧燧炫女適慎在恒相文取相業男嫌為嗣相業取相誠男炫為嗣女適高見龍李求敏相奎繼男燧相德男也女適朴海龜相德三男炯燧燧

雲石遺稿卷之十三

雲石遺稿卷之十四目錄

誌文

綏陵遷奉誌文

行狀

孝顯王后金氏行狀

領議政桐漁李公相璜行狀

知中樞府事金公太虛行狀

見哉雖然必躬審以盡其誠博議以重其事然後庶
可也從之臣等退而相謂曰昔者 穆陵 長陵
寧陵 顯隆園與 健陵之遷奉也皆自羣下發之
覩記所逮班班可考今茲之舉天實啓 聖衷非臣
等所能及也既詢謀僉同命大臣禮官及敦匠之臣
廣行相視卜于楊州之龍馬峰下癸坐原將以閏五
月二十日甲辰舉緬奉之禮凡自啓 舊陵營新兆
皆 親行之雖服飾儀節之微詳加折衷務歸至當
由是卿大夫軍民耆老舉翕然欽服曰此吾 王不
洎之慟靡極之思也既又見山川融結自成聖人之

藏又相與慶曰此天造地設以待有德者也 殿下
以幽宮之誌禮不當仍舊謂臣寅永曾忝姻屬屢陪
清燕且舊太史也命臣改撰之臣愴昔年之殊眷悚
今日之特旨不敢言辭謹拜手稽首披涕而為之言
曰 王姓李氏諱 字 我 純宗成孝王之適
長子我 正宗莊孝王之孫 母妃金氏即我 明
敬文仁光聖大王大妃殿下領敦寧府事永安府院
君祖淳女也 妃趙氏即我 孝裕王大妃殿下領
敦寧府事豐恩府院君萬永女也有一男即我 主
上殿下也 王以 純廟九年己巳八月九日丁酉

誕降于昌德宮之大造殿壬申七月丙子冊爲王世子行禮于熙政堂丁丑春陪父王謁太廟是年二月謁聖廟仍齒于學己卯三月壬子行冠禮于慶熙宮之景賢堂十月壬寅行嘉禮于於義洞之本宮癸未承命侍坐於殿座及臣僚進接之時是冬承命攝太廟享丁亥二月甲子承命代理庶政庚寅五月六日昇遐于熙政堂之西夾室春秋二十有二既殮遷殯于歡慶殿四日而成服越三日戊辰賜諡孝明墓曰延慶廟曰文祐八月四日己丑大葬于楊州天藏山西坐原懿陵左岡也暨今上

元年乙未五月丁丑追尊爲王上諡敦文顯武仁懿進廟號爲翼宗進墓號爲綏陵丁酉正月附太廟王號敬軒有御製七編附刊于列聖御製之下嘗以手書下春桂兩坊曰予年今十九春秋矣只知燕閒之爲樂不識典學之至重荏苒之頃已過許多日月自顧其中不覺悚然而懼赧然而愧今當月之正日之元矣頓變前習之悠泛將懋猛省之新工惟我兩坊宮僚各存飭勵之戒克懋陳勉之義朝野相顧聳然蓋丁亥春也及二月乙卯純廟命行賓對招時原任大臣下備忘記曰予自辛未以後

多在靜攝之中雖或粗安有時常致機務多滯國人之所憂卽予之所自憂也世子聰明穎睿年漸長成邇來之侍座攝享意有在耳遠稽有唐近法 列聖代聽之舉予心已定一藉分勞以便調養一使明習以達治道 宗社生民之福也咸造在廷爰告大計於是諸大臣進曰 殿下今爲無憂之文王也遂請庶政庶事以乙未 莊孝王故事爲準 王三上疏懇辭答曰予勞爾代卽亦天道之經予豈非經之是蹈乎敬之哉四勿修身之本九經治國之要克勤克儉不作無益視遠聽德用孚于人心越十日 王乃

代聽于重熙堂受羣臣賀於是厲精圖治不敢違寧食或至日中晷寢必夜分綜理庶務綱舉目張百僚以儆萬姓以悅常曰銓曹政本所係令擇執法之官司牧之任而辭陞者必面諭而遣之復命者必召見而詢之以民生休戚在於此也革科場之積弊而儒生講製輒按日次戒課試之修舉而文武肄習每多親臨或獎拔以激之或督責以勵之又令八道道臣博搜草野之有經行者以人材成就在於此也滯獄者必多 親決蹕籲者必先躬覽詰營伍之制申巡綽之禁飭坐衙之規嚴監守之法靡事不舉靡弊不

究以天工治忽在於此也值三南告饑大發帑以賑之關北有懷襄災亟命關東嶺南船粟往哺仍遣近侍之臣慰諭之又選卿宰侍從五六人分差最甚邑守令俾盡奠安之策南北之民賴是無捐瘠者此王治法政謨之畧也當丁亥七月 元孫之誕也王以天休滋至邦運永孚思有以掄揚盛德乃於秋九月請上 兩殿尊號 純廟撝謙堅不許 王率百官庭請上疏切懇者再得準許以是月辛亥上尊號于 父王曰淵德顯道景仁純禧 母妃曰明敬親上冊寶戊子 母妃春秋滿四旬二月壬午進爵

于慈慶殿凡需皆自內供辦不令煩度支翌年己丑父王寶齡亦躋四旬二月癸丑率百官進饌于明政殿行九爵禮越三日又進小爵于慈慶殿冬命以明年九月冊 王世孫豫選僚屬 純廟舊有御容摹本奉安于書香閣庚寅春 王請改摹大小二本既成 睿筆書標題于上並舊本移奉于 奎章閣之宙合樓此 王致孝節慶之節也先是 母妃獲維龍之夢及將婉彩虹起禁苑流于 太廟之井驟雨作迅雷發旣誕卽霽寢殿上常有五雲護之彌日不散洵聖作之符也 王犀角龍瞳嶷然有天人之表

宮中人咸曰絕類 莊孝王也甫四歲西賊平捷書至 王時哺乳舍而笑曰快好哉姆問之答曰盜已擒豈不快好稍長人或以 列聖朝諸盛德事仰質曰 邸下亦能之否乎輒曰能 睿知夙就多此類也其入學也請業於博士曰何修而爲聖人儀度凝定音吐弘鬯園橋門觀聽者皆相賀曰真聖人哉仁孝之性根於天賦 父王雖鍾愛甚常敬畏不敢有所恃至嬉戲嗜好之事 母妃禁之則止辛巳 孝懿王后禮陟 兩聖在哀疚中 王遑遑如不及左右寬慰勉進粥飲壬午 綏嬪之喪亦如之及青陽

府夫人卒 母妃處別殿哀毀甚 王流涕徒跣持湯劑將護設幄于殿門外不復歸寢室及公除 母妃謂 王曰吾與汝久相守今當還次殊悵然也 王對曰小子當有以仰慰矣自是晨省而逮日暮昏定而至漏盡者數月篤於友于大君生日撫視喜曰吾弟何時如我長及天愴惜不能已視諸妹不以貴賤有間明溫主同胞而齒相比故情尤篤其出閣也常戀戀也永溫主後宮出也生而多病故每憐之其卒也下涕漣如曰其慈母情尤可悲也蓋於倫理之際情盡意切有如此尤謹於祀典自攝行之後凡

廟祀 宮享躬將居多致齋之始既禋之後肅穆莅
事誠敬並至雖尊彝錫豆陳設之儀登降拜跪唱贊
之節必審必慎罔或有失嘗病 廟樂之腔促調數
飭樂官釐之蓋亦有志於朱絃之疏越也至於江漢
風泉之感有寤寐不忘者 皇壇品式有加禮焉象
胥自燕歸購進 皇朝實錄四百餘卷令閣臣序閱
編次奉藏于 大報壇之奉室奉先之誠尊王之義
於斯盡矣恒謂民爲邦本農爲民本乃王政之先歲
首勸農之音或有 親製以下者備述稼穡艱難閭
閻窮苦之狀至誠惻怛溢於辭表使工繪耕織于屏

以備昕夕警省諸道遇水旱疾疫之災若恫在已蠲
逋減租不少靳焉責躬之意有足感回天心而每飯
或有一粒之墮者必掇而噉之曰天賜不可褻也崇
儉之德迥出尋常非上服不近緞綺見 元孫斑衣
有緞品曰穉兒何用此爲况予所不服乎令亟改之
燕室翛然屏去一切閒漫日親經傳課誦有程常以
務本節儉敬天勤民法先王嘉謨一句語爲自警又
曰心經近思錄非求於外而在吾方寸之中此所謂
古鏡重磨也暇則以詩文游泳自然有風雅典謨之
體制天縱然也待羣臣和而莊簡而有禮每進對酬

醉如響洞然無畦畛宮僚燕見多用家人禮字而不名尊禮耆者優容規勉大小廷臣未嘗有非罪而被斥者進饌時大司憲朴綺壽上書論女伶入禁中事始令竄外未幾特宥擢拜刑曹判書仍褒其直有慎宜學者出位陳書陰欲戕陷搢紳而陽藉庚申五晦筵教以眩惑人心遂仰稟而亟誅之咸以轉圜之盛折奸之嚴頌之嘗從容告母妃曰往事多可悔平日信人如已近覺其不然世人皆爲己私非真爲我又對侍宦指所翊屋曰曩使予如今日必不建此也卽永安國舅所承聆於大王大妃者也 純廟親

撰 殯宮祭文畧曰清明粹美之姿吉善祥和之氣天之所以降之者不易而及其摧折也忽嬰之以危急之病又重之以乖雜之證如流斯坎如燼斯灰理之難諶胡遽莫淹豈所謂丕子之責于天者耶夫以兩聖之聖明形容德美若是其真切著明千載之下可以永有辭矣臣竊惟 王挺特達之姿奮英發之志代臨萬幾不過四載而 純廟所戒四勿九經之宏綱大本旣皆立矣又其數年之間吉慶荐疊祝聖壽而致誠啓邦籙而詒謨協氣歡聲洋溢區宇苟使天假之以年壽道久而成德博而化則天地日月

之所以無私堯舜禹湯文武之所以精一執中者庶幾於吾身親見而理有推斂運有否乖皇穹不吊蒼生無祿若是者雖聖人有不能挽回也嗚呼痛哉然禮陟之日自百官士庶掖庭衛士至滿城輿僮婦孺舉皇皇如喪厥考哭聲殷地不數日達于八方時禮官援英廟纂定喪禮補編上服斬三年條議大臣儒賢而行之民始慰其慟寃之情而凡有血氣含生之倫至于今咨嗟詠歎愈久而愈不能忘傳曰君子賢其賢而親其親小人樂其樂而利其利其斯之謂歟况我主上殿下寶籙鼎盛治教休明以承萬

億年無疆之基螽斯麟趾之繁且衍當拱手俟也王之深仁厚澤有可以昭受上帝啓佑後人而傳云宗廟享之子孫保之者不其信歟臣本茂學不足以摸天畫日光聖德於三古揚徽烈於無窮幸賴有舊誌遺狀之可據者畧加撰次不敢有所闕漏而白首無死忍泚筆爲先王文字役欲以是區區者酬報萬一於覆燾帡幪之地吁亦妄且悲矣

行狀

孝顯王后金氏行狀

大行王后金氏貫安東其肇祖曰宣平以古昌城主

佐麗祖有功封太師古昌卽安東府也自是簪組相承十五世而有諱尙憲當我 仁廟丙子秉義斥和以尊 皇朝再拘瀋陽聲名振天下官議政府左議政諡文正配 孝宗廟庭至其孫壽恒官領議政肅廟己巳 仁顯聖母遜位執正議爲羣凶所誣受後命及甲戌改紀復其官諡文忠子昌集又官領議政 景宗辛丑 英宗建儲力扶 宗社大計又爲羣凶所誣受後命及 英宗建極復其官諡忠獻配英宗廟庭自文正以下三世世作元臣不以死生禍福易其心俾我義理有辭彝倫復明統緒罔墜式至

于今國家賴焉是故天以福慶佑護其子孫克昌而熾以再膺沙麓之祥報施之理亦不舛矣忠獻之子濟謙官承旨 贈左贊成亦與忠獻同禍有六子第四子諱達行 贈左贊成今我 明敬文仁光聖大王大妃曾祖也第五子諱坦行於 后爲高祖官府使 贈領議政曾祖諱履素官左議政諡翼憲祖諱芝淳官牧使 贈領議政父祖根今領敦寧府事永興府院君母韓城府夫人李氏縣監 贈吏曹參判義先女判書台重曾孫麗朝名臣韓山伯穡後也 后旣胎光鍾美不受休命以 純宗戊子三月十四

日寅時誕降于觀光坊安國洞外氏第 當寧三年
丁酉春 上冲年嗣服壺位未立既制闕冊妃 后
以三揀禮成館于別宮三月下旬行 親迎儀于時
也 宗祊有所鞏固臣民有所依恃 兩慈殿亦爲
之嘉悅暨九年癸卯八月二十有五日乙丑 后以
微疾昇遐于昌德宮之大造殿春秋十有六天既昇
后以仁聖之姿乃嗇其壽止於斯嗚呼痛哉我 主
上殿下興良佐之感慨 徽音之邈爰降 御製行
錄俾有徵信於百世其錄若曰 大行王妃誕生時
有瑞氣從東而起亘于產室以及厨中飯羹之鼎照

燭光明見者異之性極孝順自幼孩異凡嗜好之味
雖已入口父母言其不可則不待訶責吐而去之六
歲隨父親在宜寧任所適遘疾出寓距內堂只隔一
門自秋經冬已臻復常離違之情恒切于中雖有時
悵望以未承親命不敢一踰戶闕與他兒嬉戲或有
大拂意者無所爭競輒以溫言調解之至於一花一
草之微未或摧折咸使之培植而長養及十歲膺德
選入宮舉止端重步履安詳性度沈默而和順溫厚
之意蘊於中著於外非禮之辭不吉之言未嘗一發
於口令儀令德儼然如成人承事 兩慈殿出於至

雲石遺稿 卷十四
誠晨昏問安之節洞洞屬屬罔或有怠 兩慈殿亦稱其至孝眷愛彌篤大漸前數日 慈殿下臨問疾則猶能梳洗起迎不敢以褻衣見其平日莊敬推此可知故每當本家人進見之時慥慥自飭者或恐有違於宮壺之徽範而已一言不及於私御下極其慈諒指導教諭無疾言遽色嘗見宮人輩以滾湯潑之地甚不豫止之曰恐地上蟲蟻之屬因此被爛以傷生命其宅心之仁及於微物蓋如此此皆承聆於兩慈殿撫實之 聖教非予有一毫溢美辭嗚呼福善天理也仁者壽人道也七載中壺內助罔愆而旣

不能有嗣育又不能致遐永卽我 列聖以來所未見也豈天理人道有不可謔而然耶予所以痛悼不已者是耳仍以狀德之文命之臣臣惶懼不敢辭亦不敢以隻字片言或有增損於 宸藻者蓋謹之也雖然臣竊伏以爲 兩慈殿止慈之眷由於 后根天之賦愛日之誠則臣以是恭知 后思媚嗣徽之盡其善也臣又以我 聖上終始敬禮之篤且摯發諸雲漢煥若日星者仰推則 后之配德於天地儷光於日月克贊我端本正始之化可以見矣 后自正位長秋曰生之德普洽於蟲卉而訓教不出於內

雲石遺稿 卷十四
廷恩澤不及於私家至靜至柔大公以正雖珩佩覲
穆而六宮之頌可以作矣逮夫諱音一頌凡東土老
穉含生之倫莫不號呼街路如喪厥妣臣於是又以
驗我 后深仁厚澤無不持載譬如陽春噓而時雨
潤民之不能忘有如此者臣以是稽之詩書所述彤
管所載聖女哲妃之事其何以加諸斯乎羣臣遂議
上尊諡曰 孝顯慈惠愛親曰孝行見中外曰顯殿
號曰 徽定陵號曰 景陵陵在 健元陵西岡而
坐庚向甲是 穆陵舊基而爲二百年秘藏者也
上以已驗上吉之地考之記注詢之僉議用是歲十

二月二日庚子因封如禮臣又以是知陪奉先兆若
有俟於今日實我 后平素蘋藻之孝有以致 列
祖在天之靈默佑於冥冥也嗚呼媿哉

領議政桐漁李公 相璜 行狀

公諱相璜字周玉全州李氏也系出 太宗第二子
孝寧大君靖孝公諱補房瑞原君兵曹判書夷安公
諱案高林君諱薰長堤副正諱源孫卽靖孝下三世
也自是屬盡而有諱浩薦仕別坐 贈執義生諱彥
師縣監 贈吏曹參議生諱慎誠遊牛栗兩先生門
奉事 贈左贊成沙溪先生與門弟子論當世第一

人曰恨君輩未及見李奉事生諱絜受業于牛溪沙
溪暨登朝以清名直節爲士類宗主丁卯虜亂與清
陰八松諸公秉大義抗論官止大司憲 贈領議政
諡忠正號松郊生諱之恒副提學生諱元龜牧使
贈左贊成號觀物齋生諱泰壽逸諮議遷司禦俱不
就號止谷寔公高祖也會祖諱道翼世其學官翊衛
贈吏曹判書祖諱時敘 贈左贊成考諱得一以文
學名世官承旨 贈領議政妣 贈貞敬夫人文化
柳氏縣監諱聖模女三世 贈誥用公貴也公以
英宗癸未生幼聰警異凡兒有一先輩以鑑識名見

公嬉於庭愕曰是大器可敬也議政公抱公步中庭
會夜星宿滿天命賦之公方讀千字文應聲曰天上
星之家地上人之家議政公大奇之十二歲丁外艱
幘容哀節儼若成人有二兄俱蚤世惟母夫人及二
嫂在嫂嘗見公泣公問嫂何泣嫂曰門戶衰所望惟
叔耳叔不讀書喜走作吾安得不泣公矢不再痛自
刻悔以至成就是日有所感也李月巖匡呂文章士
也以左氏傳授公慨然曰學問之資而俛舉業可惜
也脩井鄭尙書景淳有藻賞見公功令必卍之曰是
將位極人臣矣公自遊泮庠間聲名藉甚嘗赴庠試

雲石遺稿 卷十四
主試者欲致公爲名送關節公謝却之 正宗丙午
中進士未匝月擢別試丙科隸槐院旋入翰圈付檢
閱未幾坐微文責以自囚因使金吾郎賈箋題促令
製進公立書以徹晷不移矣促入侍仍以箋示政院
實寵之也丁未被講製文臣選每臨殿課試 親第
其甲乙公屢居魁輒蒙賜書而內苑賞釣之會曲水
修禊之宴多以特教與焉始 上之在春邸也議政
公久於宮僚受知最殊故 上悼其未及用自公應
講之初特賜褒諭常以家人視公屢下念舊之教
上之眷厚公非特公自契也坐微事罷仍以在直不

讀書下嚴教命賈論語一部迸于東湖之流霞亭使
將所課日聞之尋命還付己酉冬以 顯隆園遷奉
時陪從勞陞六品拜司諫院正言庚戌拜兵曹佐郎
出爲江西縣令壬子以弘文館副修撰召還兼中學
教授文臣宣傳官時有疏論瀛圈者與圈人皆自引
公亦違召蒙遞旋命設庠製又違召 上教曰兩司
侍從亦爲此任則上雖以三司責之當者認爲兩司
何不可也特命刊本職與館銜施以國子分館未久
除副校理兼西學教授移司憲府持平成均館直講
癸丑復授副校理公猶力辭命割名於本館錄以中

批施行夏差嶺南暗行御史既復命條陳驛田之濫
稅寺奴之釐貢仍及節儲置展糴捧諸痼瘼 上獎
之以論列爲精約譽疵有料量所採施者甚多而被
公舉劾者亦服處心之公至令其子弟釋嫌焉旋辟
典籍訓局郎時母夫人衰病甚公疏請數年暇 上
批曰情理非不稔知何必長暇然後養親乎遂不許
甲寅除獻納俄陞應教執義而關西按查御史擇授
也湖左京試官未赴也間又差別兼春秋籌司郎秋
以 明陵親祭執禮勞進通政拜承政院右副承旨
轉左乙卯歷兵曹參知適公承命校儀軌於記注中

見承旨蔡弘遠筵奏有撓逼語公疏辨之批甚嚴及
復入喉院自引不敢膺特補永春縣監公不以譴斥
自疎吏事爲鄙疏陳還逋軍額站船諸弊 上賜批
褒之及冬教以篤老離舍之難命內遷除司諫院大
司諫丙辰除刑曹參議又引前義特遞丁巳屢拜佐
貳喉院皆不就遂陳情乞養 上還其疏曰家貧親
老通朝所知也命擬慈山府使使之將老兼使官享
於祠版亦由念先故也冬丁母夫人憂辛酉服闋當
純宗初服復除諫長以勤學問親賢士遠宦妾擇牧
守四者疏勉凡數千百言 上嘉納之秋出牧光州

雲石遺稿 卷十四
捐廩而蠲徭貿牟而備荒民竟賴之建閣寓去思焉
癸亥入爲成均館大司成拜兵曹參議仍兼國子甲
子因喉院微事在罷散中際有平壤火警特敘公爲
慰諭使公簡徒疾行至則宣布德意俾有以感悅聳
勸及還條奏奠接營構者甚悉並蒙採納焉冬授黃
海道觀察使時有勅使行凡所措畫須緩急較緊漫
不錯一籌民不知迎送勞也丙寅廟稟擢嘉善階迄
滿遞付同知中樞府事轉漢城府右尹兵曹刑曹參
判同知義禁府事都摠府副摠管差承文院提調
經筵特進官戊辰拜工曹戶曹參判己巳兼同知

經筵事差備邊司提調夏分司開城先是府有亂民
獄首黨寔繁議者皆以爲在法當並屠之公覈其實
斷其魁大辟餘付脅從府人咸服爲畫像祀焉庚午
夏移全羅道觀察使值己巳大浸民皆不保朝夕公
殫心竭誠以拯濟一方爲己任先以民事切急者五
條陳疏曰物故軍伍之蕩免也陳廢田結之查檢也
漁鹽船稅之量減也流亡大同之蠲免也停退還餉
之緩限也 上批之曰接卿疏罔非生靈切害也喜
卿綜密爲民惻然又教曰自見此疏樂而忘食若有
盡祛巨弊者然廟堂其講究以稟或難之以經法公

雲石遺稿 卷十四
再疏爭之 上優批特許湖南人無不讀公疏而感泣秋又不熟公亟請於朝得三萬穀又捐廩補之實心措畫全省無捐瘠者且以荐荒之後民乏耕牛爲之市牛而差分之列郡多勒石頌焉辛未春陳病遞大臣請仍之公以部內南固山城爲天險而其下萬馬洞有南口北口爲左沿往來之要地遂築城於南口以廩餘穀作糶糶歲取二千緡爲城需置別將以守之又另儲三千穀以爲北口築城之資值西警民日三四驚公素不喜聲樂乃大張樂竟夜由是民情帖然壬申疏遞還差備堂仍察有司拜禮曹參判夏

擢正卿階資憲拜知中樞府事移漢城府判尹刑曹判書兼都摠管奉常寺司饗院提調知 經筵事轉知敦寧府事司憲府大司憲癸酉充謝恩正使赴燕還除戶曹判書提調平市署內醫院兼弘文館提學甲戌連拜藝文館提學乙亥兼左副賓客夏出爲平安道觀察使時承搶攘瘡痍未蘇公甫下車凡爲瘼於軍民者皆條列登聞減軍布以免冤徵添餉穀以補支放蕩停餉設射課以至蠲徭完儲皆取辦於廩俸之節蓄不以絲毫自累明年疏遞又以大臣之請仍其任及冬始還西民之立石記績殆無邑不然丁

雲石遺稿 卷十四
丑入爲兵曹判書兼內贍寺提調同知成均館事冬復拜戶曹判書戊寅 獻敬嬪祔宮時以敦匠勞進正憲差貢市堂上又差節使未赴已卯夏 王世子將行嘉禮差都監堂上兼知春秋館事庚辰春拜吏曹判書夏有投通泮中者語逼公政注事公引義不行政 上命問啓下嚴教切責其過當而罷之繼以抑黨習端士趨辭教縷縷命配其人旋仍公前職敦飭之公不獲已復出秋遞拜知敦寧兼右賓客典醫監提調辛巳春差 孝懿大妃山陵都監堂上拜議政府右參贊又差陳奏使辭不赴 山陵禮成陞崇

政拜判敦寧府事兼判義禁府事冬追以使事控免坐罷其時差使銜者多以故辭免故也尋敘壬午拜左參贊差造紙署提調宣惠廳堂上公自銓部事後多處郊廬一切逡巡於周行及是力辭不獲仍拜禮曹判書兼弘文提學公會主增廣東堂會試適相臣汎陳試弊公以此爲難安而時有撰詞命事屢違召以是職主試也 上察之移授藝文提學癸未以徽慶園上謚時捧冊印官承錫馬之典甲申差司圃署提調夏復授兵曹判書尋拜戶曹判書兼典醫監提調九月特旨進拜議政府左議政兼 世子傳諭

雲石遺稿 卷十四
日今國勢之岌業民生之困窮俗尚之浮靡紀綱之壞圯日甚一日凜乎有板蕩顛蹶之形苟非德望才具之人起而振之亦無如之何卿粵自簪筆受知先朝廉謹貞固夙承華褻逮在今日績著內外望實之隆輿人皆推廊廟之寄尚云晚矣公屢上章力辭批旨彌隆至遣正卿召之公乃出肅及登筵首以聖學爲勉仍陳 睿德將就之方曰雖有賓師之輔導僚屬之啓沃其濡染之易觀感之速豈能及我殿下身教之萬一哉講學成憲卽 列聖所以燕翼詒謨於 殿下者 殿下盍思所以繼述之又以是

詒燕我 春邸也又曰資益 睿學在宮僚之得人賈誼所以有左右正人之論宋帝所以有在館讀書是合東宮官之諭自今另擇久任亦不必專求於名闕華胄端良博雅惟人是取又以擇守令嚴殿最正俗尚立紀綱抑宦妾五條反覆爲說皆切時弊皆嘉納焉兼內醫院都提調乙酉有掖屬與禁隸鬪命訓局查之公奏曰覈罪囚法曹事也舍而付之非掌法之地例外也凡事關掖屬者宜付法司一與朝廷處之夏旱甚有圭璧之舉公連陳應天以實之道仍請講荒政以備豫審冤獄以疏鬱並從之丙戌夏以病

辭相職章三上遞付判中樞府事丁亥二月 翼宗
大王代聽庶政公因庭賀達曰今日卽我 邸下代
聽之一初正衙天其命哲命吉實基於今日日前
聖教以孝友恭儉敬天愛民爲教大哉王言此誠唐
虞授受之心法也僚相才以敬天之說有所仰勉臣
請以愛民之說獻焉傳曰節用而愛民易曰節以制
度不傷財不害民蓋侈用則傷財傷財則害民故愛
民之本在於節用節用之本在於崇儉今帑藏之積
倉廩之蓄罔非農夫紅女膏血中來忍以侈而至於
傷傷而至於害乎先從供御之用裁省之卑宮菲服

躬率而臨之下必有草偃之化爲民牧者效廉謹爲
有司者知典守使不至傷財而害民則此爲愛民之
實而君以民爲天此實亦爲敬天之實也 世子以
忠愛之言敢不銘佩答之夏復授左議政令旨諭之
曰自卿職在賓客予之託心者已十數年眷注懇甚
公屢辭 世子手答而勉之不得不出膺秋以 兩
殿上號寶篆書寫勞又下錫馬之賞時公連以疾乞
解書凡六上令答有未安之教公遂胥令 世子爲
之收還仍促赴賓對曰左相如不筵朝予雖終日將
坐而待之公不敢復辭遂登對以遇事徑情馳驟羣

下縷縷陳戒又以節財用一事仰達曰有賜予常如韓侯之惜弊袴有營構常如漢帝之罷露臺有珍玩常思舜臣之諫漆器有服色常思晉武之焚雉裘惟是慥慥有不容斯須放過者時本兵及將臣因警邏有令來待而喉院不及知公爭之曰朝家豈可有喉院所不知之命令亦豈有喉院所不知之去就乎戊子常參公陳戒曰 邸下自代聽以來求助之志屢形於辭旨而今且經歲寥寥無聞是豈真朝無闕事而然哉殆上有以致此耳廷臣之所嘗仰勉止講學一事而 邸下有若不概於衷有言則雖似翁受夷

考則未見敷施若有直言讜論拂於心而逾於耳者則 邸下之必求諸道不至於訑訑拒人者有未敢仰必近日言路之不廣安知不由於是乎尋乞暇省墓歸止郊墅復上書申前懇令答轉摯至以躬迎爲教公胥令于高陽獄轉而至揚州獄 世子遂下令曰明日當郊迎公震迫靡措進胥金吾 世子教曰卿若一番出城予當一番郊迎卿若十番出城予當十番郊迎予心已定卿豈不諒公惶懼還第上劄請謹旣而有賓對令公又以疾辭 世子令展期及期又諭之曰卿如不筵朝予當坐堂而待公遂進對以

興作遊豫反復陳戒間拜 社稷署御營廳都提調
已丑 大朝寶齡恰躋四旬 世子進饌以識慶大
司憲朴綺壽論女伶習儀事被竄公劄救曰使綺壽
而設有妄言其官則言官也其事則言事也猶宜寬
假而扶樹之况其言或慮其累 睿德而招物議此
固宜採而不宜譴也未幾特宥臺臣公繼又陳病乞
解至六書十告獲請付判中樞府事旋以瀋陽使出
疆未反命承重卜之命公從縣途再辭不獲冬復差
內醫都提調值隆寒有釋囚令而繡論被逮者混其
中公謂分遣繡衣所以考吏治察民隱爲懲勵之政

而若因一時倖會並皆宥免則有非委遣刺舉之本
意請令還囚議讞公之甥亦因是譴配而不顧也內
需司以烏松漁鹽之願屬該司有手本達下者公以
爲啓刁徒陳告之奸干國典冒占之禁此習決不可
長並請勿施又曰建官而懋德設科而蒐俊卽人君
馭世之柄而爲磨礪之具若於此不能慎而流於濫
不能公而涉於私則名檢敗而囂競興世道之憂容
有其極又曰古人之語治道者必以抑僥倖遠貨利
爲大目倖門一開遂使左右之人皆蓄非分之心則
此實召亂之階也今所謂利竇者皆從倖門中來百

計刁鑽無事不營使中外有宿業者皆與愁怨有見識者舉懷憂歎終未有人心離而國不危且亡者也今或有進言於上者以爲不病於民無害於公而有可以生財云爾則卽是欺罔奸弄之甚世安有理外之事乎設使有之亦必是巧征而陰奪也忍敢以是聞之於上乎先就此一二人顯斥而痛繩之然後羣萌可折衆怒可弭並賜嘉納庚寅差軍資監訓練都監都提調 王世孫冊禮議定公陳戒曰蒙養之正實爲聖功漢臣賈誼之告其君以早教諭爲三代久長之本我 大小朝遇物之誨靡事不然而臣則曰

言教之效有不若躬率之爲尤親切易觀感卑宮而示土木之不宜事澣服而示綺紈之不足貴器用則示之以不求雕飾飲食則示之以不取甘醲信賞罰而示喜怒之必公節財用而示經費之當恤以至遠近習之便佞而示宿儒拂士之不可疎逃待屏異書之奇僻而示聖經賢傳之不可須臾離動靜語默監法常在於是則習與知長化與心成爲堯爲舜其基在是時有西闕役將寫材嶺南統帥違廟飭非時役民公請削其職 世子軫迎送弊姑令緘推公劄申之 世子許其請而辭旨有難安者公胥于金吾

雲石遺稿 卷十四
世子爲收其句語而慰諭之公仍劄勉曰辭教所發緣臣而失平玷累於辭經聲律之盛易不曰以虛受人乎虛則有容物自順應今 邸下偶有一言不概未見克恢聰聽每以不豫之意致煩非常之教雖舒氣而求言猶懼不至率是而言其孰敢言 世子優納之時設忠良試賜武第多至十人公以恩不可濫請第其最等餘赴解額五月 王世子喪變有服制議公據先祖忠正公議 昭顯世子喪制以斬衰獻議焉時公在嘗藥之任故臺論遂發公自金吾胥命仍遊城外轉尋鄉路 上屢諭以臺言無據又命撰

進 世子行狀至遣正卿偕來公堅引不敢出歷月始解相職秋除 景慕宮都提調九月將行 王世孫冊禮復授左議政兼 世孫傅公又力辭 上下惻怛之諭曰以家則只一穉孫以國則卿等舊人數人而已予將誰與依賴乎公義不他顧遂出膺冬以冊禮奏請使赴燕辛卯春竣還以田結奴婢廐馬賚焉夏以 文祐廟敦工勞又錫馬公每以還弊爲厲民之本請犯逋之在律當死者無或曲貸始逋掩逋之守令一斷以配錮常法又言京外駟詐遊手之輩巧穿利竇無所不至凡有米鹽船舶之所泊魚鮮塲

基之有主者或受宮房圖署或持衙門關文作爲藉
賣公肆占奪痛切爲說請嚴禁之並賜可壬辰入者
社引年乞休章五上許免而不許休付判中樞府事
尋陞領府事差司僕寺提調癸巳夏復起爲左議政
諭之以卿雖欲固守雅度未可以爲予一勞乎旋陞
領議政兼 世孫師適有中官拿而卽宥者公以審
微謹漸之意陳戒仍言掖隸橫濫之習請加戢束皆
蒙允可間差奉常寺司譯院禁衛營都提調又特授
扈衛大將甲午又引病三章獲遞付領樞及 純廟
昇遐 文祐廟追崇禮成公以敦匠勞又承錫馬

上冲年御極 大王大妃垂簾同聽政公與諸大臣
聯陳六條勉之又於乙未歲首以慎起居勤講學抑
近習杜倖門察民隱節財用敷陳焉夏差 實錄摠
裁官丙申冬差 祔廟都監都提調丁酉冬復授元
輔諭之以 三朝舊臣國之元老今茲重卜簡自
慈衷公卽幡然膺命因講筵奏曰 殿下臨講之際
未有質問辨疑之事盖非問則無以知非知則無以
行所以經有好問下問之訓學貴切問審問之工今
進講魯論卽孔門諸弟隨事問答之語問於師又問
於友爲學之要惟問是已又言恤民之本惟在擇吏

請令廟堂及曾經道臣各薦已試有績之人各數三人自吏曹聚錄列書庸備 御覽以倣代柱之帖戊戌公屢以病乞解 上察其不可強遂勉副付西樞秋差軍器寺都提調公自是不以世務嬰心優閒頤養者有年至辛丑秋有西河憾病日甌 上臨筵頻以病加減問特賜蔘劑命御醫看護竟以是年十二月二十六日考終于正寢享年七十有九訃聞 上震悼教曰此大臣端重之姿明剴之識逮 三朝躋八耄巋然爲師保著龜予所敬信而朝野之所倚重重爲愴盡不已因賜東園副器成服遣承旨致祭祿

俸限三年輸送嗣孫待闋服調用哀榮之典於斯備矣國典當禮葬而以公遺意不敢受至三命而三辭之 上特命從優致賻壬寅三月葬于高陽下道面甘乙川里貞敬夫人虛右之原卯坐也夫人宋氏籍礪山承旨民載女也事夫子儆戒無違處妯娌人無間言宗黨咸稱之生與公同年先公三十年壬申卒壽五十無育取再從兄相琮第二子敏榮爲後官府使庶出四男一女長效榮前縣令啓榮早歿效榮敷榮女適高靈申承慶敏榮男承圭前參奉次幼效榮女適潘南朴齊崧今監察公有至性以早失怙祿不

逮養爲終身痛遇忌日皇皇如始喪時節省墓未有不泣涕也事母夫人誠懇篤至左右無方抑搔扶將殆女子子所不能而始家甚窶母夫人躬績以給饋或屢空終不以幾微色見於親及丁憂哀毀踰節茹素終三年幾不勝喪恒以未及事二兄者事二嫂一室爨殆三十年暨分門猶日再候雖公退劇擾不先候二嫂未敢歸私室一味尺帛必先進之撫諸姪如已出幼無二養長無二教嫁娶之資臧獲之分皆均焉姊貧無家館於公公奉之如奉母使姊自忘其非已家也妹少公二歲晚而比屋見輒竟晷不忍舍常

撫腮摩手驗其肥瘦其於奉先之節尤致其敬勤朔節拜參非甚疾病未或廢雖祧祀必親將大耋後家人以寒暑請節宣則公曰尙能拜跪何敢闕也推之而族戚貧窮者皆以公爲依歸公初不能自贍或典朝衣施之及貴待而舉火者常十數家歲儉則歸者愈衆計口以爲給有婚喪則曰於我乎辦無家室則曰於我乎館或值守宰之助哀慶者立散之宗黨無使有贏餘曰是饋也有名不必辭然亦不可爲他日計也自少不以家事爲累按節歸夫人無二袴襦而至施恤則未嘗計有無也性素儉常服皆大布鹿褐

雲石遺稿 卷十四
一
弊之而無厭章服亦不御帛所居室甚隘每風雨沾灑及於坐見者悶然公曰拭之斯已何傷乎凡耳目之玩好悉屏之一牀一几蕭然如寒士其養閒西樞也往來郊垆乘欵段從者僅一二人路逢騶徒必引避之臨終戒勸勿用方牀墓勿用明燈公之謙約蓋如是也生平無疾言遽色倉卒遇急不改常度嘗對客家失火公只問其火起處復談如故又嘗夜集隣馬逸躍入寢室坐客皆驚竄公坐自如徐命侍者牽去之在享班值暴雨諸執事莫不倉皇失儀公獨凝立不動或問其故公曰動亦無益於沾服也又於遼

店適與客棊從者以失使印告一行盡驚公不輟爭劫曰然乎少頃白獲印公又曰然乎更不問伴使在傍問之公笑曰是不過盜踏商貨耳急之不可推也見人有過輒掩護之或贖公書抵銓官求遷後銓家舉其人謝未及檢擬公因力託曰果有是幸無忘也在地部時有以僞署取錢穀既覺仍置之飭在傍無敢洩凡遇事雖甚急必徐究而默運不以幾微見諸外及籌劃之成綜理縝密盛水不漏欲有加損而不能得故屢按劇藩久掌度支皆在於饑饉之餘板蕩之會而必以積儲而備不虞節省而補不足爲先務

皆可爲經遠之圖曰國計羸絀專係於財賦之臣必
如貧家之婦數米而炊計縷而衣然後庶可有支持
也至於大施措處亦不以些少利害較量於其間或
似有不急者胥吏請已之公曰久當知之後果驗其
在選部也案上牘罕以選事及者卽公親友夙知公
不可以私干也與人交務知其所短必容護之平
居莊重望之有不可犯之色其卽之也樂易溫粹有
令人不欲遽離者尤善於待士雖遠方寒儒必起而
禮接之御下不嚴而威僕隸輩屏息不敢前然而至
童孩日嬉於戶外不之問與皂隸言及其親未嘗斥

言之其於文學雅不欲以此自命而凡有撰著辭達
意到其來甚易俄頃之間已疊疊鉅篇矣心不能喻
口不能宣者在筆下無不曲暢旁通及辭已竭意已
窮他人見之更無可以措語而公之文則枝上生枝
節下生節譬如山盡水迴別開洞天此公自得之妙
非人所能學也癖於看書幾乎一下屢行而案所常
留者資治通鑑朱子大全而已每郊居輒讀一經以
爲課少時善東坡楷嘗內下一冊子可百葉命當夜
寫進及曙而訖井井不錯一字尤諳國朝故事凡儀
文制度進退更張瞭然如指掌每有事引以爲據至

世閥名姓未或有差家居雖卑幼不以褻容見子姪
輩晨夕問候必飭衣帶端步趨戰兢如不能容常以
盛滿爲懼命府使君早撤舉業其或爲州縣職必訓
之曰勿以官物累余使余聞汝無得罪於國家是乃
養志也又曰負賤甚於貪人皆知貪之不可犯而不
知負賤之尤使民陰受其毒是可忍耶公之病軀也
神識不亂言語不錯方易簣時僚相有來候者公自
力起坐曰余非敢自齒相職而數年間諸大臣相繼
凋謝今只有數公公其一矣勉之哉猶諄諄語民國
事旣而命侍者曰今余病服藥固無益然蓼劑 君

賜也不可不嘗命煎進之可見公平日踐履也公天
姿英達與人殊絕而受之以宏量偉度又資進脩之
功實踐力行不離訓典自韋布時已負宰輔之望早
歲蜚英受 正廟特達之知或抑之或獎之而公則
介然自守視世之干謁標榜若浼焉有不可以威武
屈而寵辱驚者時有一宰臣居要地 上教公曰予
欲以處某者處汝公遽對曰臣誠庸愚不及某萬萬
乃所願則夔契也 上笑而嘉之嘗筵退日送之顧
筵臣曰是真廟堂器也其居憂時每下詢曰某無恙
云乎某近讀何書云乎 純廟御極注意尤摯嘗於

雲石遺稿 卷一四
文苑辭疏至以手批勉之按四節掌六部以至三事
之登庸 兩聖之師傅在 翼廟代理有下詢多用
睿札公亦手筆仰答暨 當宁凡六入中書首尾十
有九年校時任十五考者德茂績布在一代屹然如
柱石泰喬國有倚恃雖釋務退閒之日廷有大事大
疑輒就而決之蓋公歷事 四聖所藉手終始者皆
從至誠中流出必以勉 聖學補袞闕爲第一義諦
不憚其重言複言惟格君是期其或有未概者亦必
委曲懇惻不以夷險禍福有所動故爲上下所信服
如此而體國之愜匪躬之義求之古昔大臣亦未易

數數言也然而每以不能謝事爲自歉焉尤不喜以
號爲標隨所居地就而識之曰桐漁玄圃晦雲是已
世多以桐漁稱有遺稿藏于家公身不踰中人其言
謹拙若不能出諸口而至堅確強毅處實有資育不
能奪者又其談笑詼諧之時絕去哇畛吐露無餘是
寅永常所陪杖屨而欽景行者也寅永王考文翼公
與公家議政公有雅契先考孝文公繼而篤先誼及
寅永筮仕釋褐屢作公夾帑中人而猥以不才至忝
下僚常所叩質而儀準者公也公亦不以寅永晚進
或示之表襮每一拜候傾倒困廩今公墓草再宿而

老成之典型已莫逮矣撫念疇昔不能無山陽之感而又因參奉君之託不容以不文辭畧掇公言行可記者以俟立言君子卽以公遺戒不許請諡而大臣有白之者將爲狀告太常也

知中樞府事金公太虛行狀

公姓金氏諱太虛字汝實系出廣州曾祖諱次武生員 贈承政院左承旨祖諱礪判決事 贈戶曹參判考諱希曾 贈議政府左贊成三世 贈誥皆以公貴推恩也妣貞敬夫人月城朴氏正郎春秀女公世居密陽以嘉靖乙卯生二十六中萬曆庚辰武科

逮壬辰倭奴東搶先陷釜山東萊從三路向蔚山時節度使李珣郡守李彥誠棄城走兵民驚潰莫敢嬰其鋒者朝廷特拜密陽府使朴晉爲節度使而公以前任萬戶閒居于家慨然與道內士歃血倡義於八公山於是道臣帥臣因民望以公假蔚山守公跋履山谷躬自招諭願爲軍者三千人遂以郡居前縣監朴弘春前奉事全應忠分將西南面又分軍爲水師繕理船械以郡人徐仁忠將之公自率麾下隨緩急赴救一月之內八戰八捷由是賊不能來犯郡兵號精銳焉十月賊船六艘自機張界而又賊兵三百自

阿爾浦並向本郡公親領兵力戰斬首三十餘級連破二船以功陞奉正大夫兼軍器寺正仍授爲本郡守癸巳四月諸賊憤前敗分四道水陸並進公以衆寡不敵移陣于慶州戰於利見臺中洋又戰於鳳吉里前又戰於長鬻小鳳山下前後獻馘爲累數百級又居昌館前及牛旨嶺之戰斬獲甚多都元帥權公慄御史韓公浚謙兵使朴公晉並馳啓 上嘉之大加褒賞超通政階事載蔚山誌又按密陽誌曰蔚民之免魚肉左道之次第恢復皆公功云甲午陞嘉善兼助防將乙未陞嘉義拜同中樞丁酉七月與忘憂

堂郭公再祐共守火旺山城遏清正兵十二月經理楊鎬提督麻貴以六萬師圍島山公率郡兵爲前鋒破外屯有一鐵衣將登城放丸輒傷我師經理歎曰誰能殺此賊公以一箭斃之經理大喜撫公背曰朝鮮有人矣及天兵左次公與諸將金應瑞朴毅長高彥伯權應銖成允文鄭起龍諸公並還慶州又抄擊零賊於柳沙亭斬十三級體府柳公成龍啓言道內軍可用於戰者蔚山慶州之軍爲最至己亥安撫御史李尙信奏蔚與慶首當賊路戮力以捍禦終始不懈宜有以慰其勞 上可之命宣諭御史尹暉責教

書大饗兩邑士于東京此可驗公訓習之有素也戊戌八月又以前鋒從麻提督擊烏山賊己亥以助防將劄住蔚山夏特拜星州牧使兼右道防禦使庚子春御史曹倬奏公治軍民第一辛丑二月代鄭公起龍陞拜右兵使壬寅春李公德馨以星州事啓罷未幾奏公智勇不宜置閒八月以釜山營將拜左兵使兼蔚山府使時郡已陞府矣仍寵賜大學一部甲辰滿瓜授本道防禦使在家待變及策宣武勲始錄公爲三等或有憇之者降爲原從一等冬陞資憲大夫都摠府都摠管乙巳復授防禦使柳永慶以首相使

人致意曰防禦非實銜若見我當優敘公不答更要之已倣裝出都門時議右之丙午五月再授右兵使繕城堞飭樓櫓戊申解歸有愛民興學之頌辛亥又爲防禦使都摠管壬子冬拜洪忠兵使癸丑辭連朴應犀誣告獄罷尋敘拜都摠管辭歸乙卯召拜扈衛大將又辭庚申三月十五日考終于鄉第訃未及聞除知中樞府事而輟朝賜祭賻竟如禮葬于本府大寺洞甲坐之原配貞夫人扶餘白氏宣傳官秋行女生一男二女男守謙從公起義錄原從二等官副護軍女宣傳官成擢士人金瀛孫曾以下不盡記今之

請狀者七代孫定權八代孫志元叔姪也公姿性質
慤有古人風不修飾邊幅而臨事毅然不以死生動
其心故能奮忠於危難之際收績於敗殘之餘累啓
闢鉞名在盟府足以耀青史垂不朽矣公乃謙挹而
不伐廉介而自守若未嘗有汗馬之勞者晚值昏朝
有除拜輒力辭不起構亭於雲門山下扁曰博淵時
與文士歌詠以終老盖嘗論之當倭燹之劇也嶺湖
義旗磊落相望而或死於事或微而不甚著其能效
敵愾禦侮之烈者盖寡矣惟公仗義如權花山處功
如郭忘憂忠毅鄭公武毅朴公皆公一流人然今距

公二百餘年世無有道其事者斯豈非掌故家之過
歟今因其系闕官簿而傍採地誌野乘之可徵者爲
之狀

